

晉

書



帝紀卷第五

晉書五

御撰

孝懷帝

孝愍帝

孝懷皇帝諱熾字豐度武帝二十五子也太熙元年封豫章郡王屬漢
帝之時宗室構禍帝冲素自守門絕賓游不交世事專玩史籍有恩於
時初拜散騎常侍及趙王倫篡見收倫敗爲射聲校尉累遷車騎大將
軍都督青州諸軍事未之鎮永興元年改授鎮北大將軍都督鄴城守
諸軍事十二月丁亥立爲皇太弟帝以清河王覃太字也懼不敢當
典書令廬陵脩肅曰二相經營王室志寧社稷儲貳之重宜歸時望親
賢之舉非大王而誰清河幼弱未允衆心是以旣升東宮復贊藩國今
乘輿播越三宮久曠常恐戕飲馬於涇川螳衆控弦於霸水宜及吉辰
時登諸副上翼犬駕早寧東京下允黔首喁喁之望帝曰卿吾之宋昌
也乃從之

光熙元年十一月庚午孝惠帝崩羊皇后以於太弟爲嫂不得爲太后
催清河王覃入已至尚書閣侍中華混等急召太弟癸酉即皇帝位大

赦尊皇后羊氏爲惠皇后居弘訓宮追尊所生太妃王氏爲皇太后立妃梁氏爲皇后十二月壬午朔日有蝕之己亥封彭城王植子融爲樂城縣王南陽王模殺河間王顥於雍谷辛丑以中書監溫羨爲司徒尚書左僕射王衍爲司空己酉葬孝惠皇帝于太陽陵李雄別帥李離寇梁州

永嘉元年春正月癸丑朔大赦改元除三族刑以太傅東海王越輔政殺御史中丞諸葛玫二月辛巳東萊人王弥起兵反寇青徐二州長廣太守宋罷東牟太守龐伉並遇害三月己未朔平東將軍周馥斬送陳敏首丁卯改葬武悼楊皇后庚午立豫章王詮爲皇太子辛未大赦庚辰東海王越出鎮許昌以征東將軍高密王簡爲征南大將軍都督荊州諸軍事鎮襄陽改封安北將軍東燕王騰爲新蔡王都督司隼三州諸軍事鎮鄴以征南將軍南陽王模爲征西大將軍都督秦雍梁益四州諸軍事鎮長安并諸州郡爲劉元海所陷刺史劉琨獨保晉陽夏五月馬牧帥汲桑聚衆反敗魏郡太守馮嵩遂陷鄴城害新蔡王騰燒鄴

宮火旬日不滅又殺前幽州刺史石勒於樂陵入掠平原山陽公劉秋遇害洛陽步廣里地陷有二鵝出色蒼者冲天白者不能飛建寧郡夷攻陷寧州死者三千餘人秋七月己酉朔東海王越進屯官度以討汲桑己未以平東將軍琅邪王睿爲安東將軍都督揚州江南諸軍事假節鎮建鄴八月己卯朔撫軍將軍苟晞敗汲桑於鄴甲辰曲赦幽并司隸兖豫等六州分荊州江州八郡爲湘州九月戊申苟晞又破汲桑陷其九壘辛亥有大星如日小者如斗自西方流於東北奎蓋赤俄有聲如雷始修千金塢於許昌以通運冬十二月戊申朔日有蝕之甲寅以尚書右僕射和郁爲征北將軍鎮鄴十二月戊寅并州人田蘭薄盛等斬汲桑于樂陵甲午以前太傅劉寔爲太尉庾子以光祿大夫延陵公高光爲尚書令東海王越矯詔囚清河王亶于金墉城癸卯越自爲丞相以撫軍將軍苟晞爲征東大將軍

二年春正月景子朔日有蝕之丁未大赦二月辛卯清河王亶爲東海王越所害庾子石勒寇常山安北將軍王浚討破之三月東海王越鎮

鄆城劉元海侵汲郡略有頓丘河內之地王弥寇青徐兗豫四州夏四月丁亥入許昌諸郡守將皆奔走五月甲子弥遂寇洛陽司徒王衍帥衆禦之弥退走秋七月甲辰劉元海寇平陽太守宋抽奔京師河東太守路述力戰死之八月丁亥東海王越自鄆城遷屯于濮陽九月石勒寇趙郡征北將軍和郁自鄆奔于衛國冬十月甲戌劉元海僭帝號於平陽仍稱漢十一月乙巳尚書令高光卒丁卯以太子少傅荀藩爲尚書令己酉石勒寇鄴魏郡太守王粹戰敗死之十二月辛未朔大赦立長沙王乂子碩爲長沙王玠爲臨淮王

三年春正月甲午彭城王釋薨三月戊申征南大將軍高密王簡薨以尚書左僕射山簡爲征南將軍都督荆湘交廣四州諸軍事司隸校尉劉暉爲尚書左僕射丁巳東海王越歸京師乙丑勒兵入宮於帝側收近臣中書令繆播帝舅王延等十餘人並害之景寅曲赦河南郡丁卯太尉劉寔請老以司徒王衍爲太尉東海王越領司徒劉元海寇黎陽遣車騎將軍王堪擊之王師敗績于延津死者三萬餘人大旱江漢河

洛皆竭可涉夏四月左積弩將軍朱誕叛奔于劉元海石勒攻陷異
州郡縣百餘壁秋七月戊辰當陽地裂三所各廣三丈長三百餘步辛
未平陽人劉芒蕩自稱漢後誑誘羌戎僭帝號於馬蘭山支胡五斗叟
郝索聚衆數千爲亂屯新豐與芒蕩合黨劉元海遣子聰及王弥寇上
黨圍壺關并州刺史劉琨使兵救之爲聰所敗淮南內史王曠將軍施
融曹超及聰戰又敗超融死之上黨太守龐淳以郡降賊九月景寅劉
聰圍浚儀遣平北將軍曹武討之丁丑王師敗績東海王越入保京城
聰至西明門越禦之戰于宣陽門外大破之石勒寇常山安北將軍王
浚使鮮卑騎救之大破勒於飛龍山征西大將軍南陽王模使其將淳
于定破劉芒蕩五斗叟並斬之使車騎將軍王堪平北將軍曹武討劉
聰王師敗績堪奔還京師李雄別帥羅羨以梓潼歸順劉聰攻洛陽西
明門不克宜都夷道山崩荊湘二州地震冬十一月石勒陷長樂安北
將軍王斌遇害因屠黎陽乞活帥李憚薄盛等帥衆救京師聰退走憚
等又破王弥于新汲十二月乙亥夜有白氣如帶自地升天南北各二丈

○四年春正月乙丑朔大赦二月石勒襲鄆城兖州刺史袁孚戰敗
爲其部下所害勒又襲白馬車騎將軍王堪死之李雄將文碩殺雄大
將軍李國以巴西歸順戊午吳興人錢璿反自稱平西將軍三月丞相
倉曹屬周玘帥鄉人討璿斬之夏四月大水將軍祁弘破劉元海將劉
靈曜于廣宗李雄陷梓潼兖州地震五月石勒寇汲郡執太守胡寵遂
南濟河滎陽太守裴純奔建鄴大風折木地震幽并司隸秦雍等六州
大蝗食草木牛馬毛皆盡六月劉元海死其子和嗣僞位和弟聰弑和
而自立秋七月劉聰從弟曜及其將石勒圍懷詔征虜將軍宋抽救之
爲曜所敗抽死之九月河內人樂仰執太守裴整叛降于石勒徐州監
軍王隆自下邳棄軍奔于周馥雍州人王如舉兵反于宛殺害令長自
號大將軍司雍二州牧大掠漢沔新平人龐寔馮翊人嚴巖京兆人侯
脫等各起兵應之征南將軍山簡荊州刺史王澄南中郎將杜弢並遣
兵援京師及如戰於宛諸軍皆大敗王澄獨以衆進至汭口衆潰而歸
冬十月辛卯晝昏至于庚子大星西南隊有聲壬寅石勒圍倉垣陳

留內史王讚擊敗之勒走河北王子以驃騎將軍王浚爲司空平北將軍劉琨爲平北大將軍京師饑東海王越羽檄徵天下兵帝謂使者曰爲我語諸征鎮若今日尚可救後則無逮矣時莫有至者石勒陷襄城太守崔曠遇害遂至宛王浚遣鮮卑文鸯帥騎救之勒退浚又遣別將王申始討勒於汶石津大破之十月甲戌東海王越帥衆出許昌以行臺自隨宮省無復守衛荒饑日深殿內死人交橫府寺營署並掘塹自守盜賊公行枹鼓之音不絕越軍次項自領豫州牧以太尉王衍爲軍司丁丑流氏隗伯等襲宜都太守嵇晞奔建鄴王申始攻劉曜王弥於瓶壘破之鎮東將軍周馥表迎大駕遷都壽陽越使裴頠討馥爲馥所敗走保東城請救於琅邪王睿襄陽大疫死者三千餘人加涼州刺史張軌安西將軍十二月征東大將軍苟晞攻王弥別帥曹嶷破之乙酉平陽人李洪帥流入定陵作亂

五年春正月帝密詔苟晞討東海王越王申晞爲曹嶷所破乙未越遣從中郎將楊瑁徐州刺史裴盾共擊晞癸酉勒入江夏太守楊珉奔于

武昌乙亥李雄攻陷涪城梓潼太守譙登遇害湘州流人杜弼據長沙
反戊寅安東將軍琅邪王睿使將軍甘卓攻鎮東將軍周馥於壽春馥
衆潰庚辰太保平原王幹薨二月石勒寇汝南汝南王祐奔建鄴三月
戊午詔東海王越罪狀告方鎮討之以征東大將軍苟晞爲大將軍
景子東海王越薨四月戊子石勒追東海王越喪及於東郡將軍錢端
戰死軍潰太尉王衍吏部尚書劉望廷尉諸葛銓尚書鄭豫武陵王澹
等皆遇害王公已下死者十餘萬人東海卅子毗及宗室四十八王尋
又没于石勒賊王桑冷道陷徐州刺史裴盾遇害桑遂濟淮至于歷陽
五月益州流人汝班梁州流人蹇撫作亂於湘州虜刺史苟眺南破零
桂諸郡東掠武昌安城太守郭察邵陵太守鄭融衡陽內史滕育並遇
害進司空王浚爲大司馬征西大將軍南陽王模爲太尉太子太傅傅
祗爲司徒尚書令苟藩爲司空安東將軍琅邪王睿爲鎮東大將軍東
海王越之出也使河南尹藩滔居守大將軍苟晞表遷都倉垣帝將從
之諸大臣畏滔不敢奉詔且宮中及黃門戀資財不欲出至是饑甚人

相食百官流亡者十八九帝召群臣會議將行而警衛不備帝撫手歎曰如何曾無車輿乃使司徒傳祗出詣河陰修理舟楫爲水行之備朝士數十人導從帝步出西掖門至銅駝街爲盜所掠不得進而還六月癸未劉曜王弥石勒同寇洛川王師頻爲賊所敗死者甚衆庚寅司空荀藩光祿大夫荀組奔轅轅太子左率溫畿夜開廣莫門奔小平津丁酉劉曜王弥入京師帝開華林園門出河陰藕池欲幸長安爲曜等所追及曜等遂焚燒宮廟逼辱妃后吳王晏竟陵王楙尚書左僕射和郁右僕射曹馥尚書閭丘冲袁粲主組河南尹劉默等皆遇害百官士庶死者三萬餘人帝蒙塵於平陽劉聰以帝爲會稽公荀藩移檄州鎮以琅邪王爲盟主豫章王端東奔荀晞晞立爲皇太子自領尚書令具置官屬保梁國之蒙縣百姓饑饉米斛萬餘價秋七月大司馬王浚承制假立太子置百官署征鎮石勒寇穀陽沛王滋戰敗遇害八月劉聰使子粲攻陷長安太尉征西將軍南陽王模遇害長安遺人四千餘家奔漢中九月癸亥石勒襲陽夏至于蒙縣大將軍荀晞豫章王端並没于

賊冬十月勒寇豫州諸郡至江而還十一月猗盧寇太原平北將軍劉琨不能制徙五縣百姓於新興以其地居之

六年春正月帝在平陽劉聰寇太原故鎮南府牙門將胡元聚衆寇荆土自號楚公三月壬子日有蝕之癸丑鎮東大將軍琅邪王睿上尚書檄四方以討石勒大司馬王浚移檄天下稱被中詔承制以荀藩為太尉汝陰王熙為石勒所害夏四月景寅征南將軍山簡卒秋七月歲星熒惑太白聚于牛斗石勒寇冀州劉粲寇晉陽平北將軍劉琨遣部將郝詵帥衆禦粲詵敗績死之太原太守高喬以晉陽降粲八月庚戌劉琨奔于常山己亥陰平都尉董冲逐太守王驥鑒以郡叛降于李雄辛亥劉琨乞師于猗盧表盧為代公九月己卯猗盧使子利孫赴琨不得進辛巳前雍州刺史賈疋討劉粲於三輔走之關中小定乃與衛將軍梁芬京兆太守梁綜共奉秦主鄴為皇太子於長安冬十月猗盧自將六萬騎次于盩厔十月甲午劉粲遁走劉琨收其遺衆保于陽曲是歲大疫○七年春正月劉聰大會使帝著青衣行酒侍中庾珉號哭聰惡之丁

宋帝遇弑崩于平陽時年三十帝初誕有嘉禾生於豫章之南昌先是望氣者云豫章有天子氣其後竟以豫章王爲皇太弟在東宮恂恂謙損接引朝士講論書籍及即位始遵舊制臨太極殿使尚書郎讀時令又於東堂聽政至於宴會輒與羣官論衆務考經籍黃門侍郎傅宣歎曰今日復見武帝之世矣祕書監荀崧又常謂人曰懷帝天姿清劭少著英猷若遭承平足爲守文佳主而繼惠帝擾亂之後東海專政無幽厲之興象而有流亡之禍

孝愍皇帝諱鄴字彥旌武帝孫吳孝主晏之子也出繼後伯父秦獻王東襲封秦王永嘉二年拜散騎常侍撫軍將軍及洛陽傾覆避難於滎陽密縣與舅荀藩荀組相遇自密南趨許潁豫州刺史閻鼎與前撫軍長史王毗司徒長史劉疇中書郎李昕及藩組等同謀奉帝歸于長安而疇等中途復叛鼎追殺之藩組僅而獲免鼎遂挾帝乘牛車自宛趣武關頻遇山賊士卒亡散次于藍田鼎告雍州刺史賈疋疋據遣州兵迎衛達于長安又使輔國將軍梁綜助守之時有王龜出霸水神馬鳴

城南焉六年九月辛巳奉秦王為皇太子登壇告類建宗廟社稷大赦
加足征西大將軍以秦州刺史南陽王保為大司馬賈疋討賊張連遇
害衆推始平太守麴允領雍州刺史為盟主承制選置

建興元年夏四月景午奉懷帝崩問舉哀成禮壬申即皇帝位大赦改
元以衛將軍梁芬為司徒雍州刺史麴允為使持節領軍將軍錄尚書
事京兆太守索綝為尚書右僕射石勒攻龍驤將軍李暉於上白暉敗
死之五月壬辰以鎮東大將軍琅邪王睿為侍中左丞相大都督陝東
諸軍事大司馬南陽王保為右丞相大都督陝西諸軍事又詔二王曰
夫陽九百六之厄雖在盛世猶可講之朕以幼冲纂承洪緒庶憑祖宗
之靈群公義士之力蕩滅凶寇拯拔幽宮瞻望未達肝心分裂昔周邵
分陝姬氏以降平王東遷晉鄭為輔今左右丞相茂德齊聖國之昵屬
當恃二公掃除鯨鯢奉迎梓宮克復中興令幽并兩州勒卒三十萬直
造平陽右丞相宜帥秦涼梁雍武旅三十萬徑詣長安左丞相帥所領
精兵二十萬徑造洛陽分遣前鋒為幽并後駐赴同大限克成元勳又

詔琅邪王曰朕以冲昧纂承洪緒未能梟夷凶逆奉迎梓宮枕戈煩寃
肝心抽裂哀前得魏浚表知公帥先三軍已據壽春傳檄諸侯協齊威勢
想今漸進已達洛陽涼州刺史張軌乃心王室連旗萬里已到汧隴梁
州刺史張光亦遣巴漢之卒屯在駱谷秦川驍勇其會如林間遣使適
還具知平陽定問云幽并隆盛餘胡衰破然猶恃險當須大舉未知公今
所到是以息兵秣馬未便進軍今爲已至何許當須來言便乘輿自出
會除中原也公宜思弘謀猷勗濟遠略使山陵旋反四海有賴故遣殿
中都尉劉蜀蘇馬等具宣朕意公茂德昵屬宜隆東夏恢融六合非公
而誰但洛都陵廟不可空曠公宜鎮撫以綏山東右丞相當入輔弼追
蹤周邵以隆中興也六月石勒害兗州刺史田徽是時山東郡邑相繼
陷于勒秋八月癸亥劉蜀等達于揚州改建鄴爲建康改鄴爲臨漳杜
弼寇武昌焚燒城邑弼別將王真襲沔陽荊州刺史周顗奔于建康九
月司空荀藩薨于滎陽劉聰寇河南河南允張髦死之冬十月荊州刺
史陶侃討杜弼黨杜曾於石城爲曾所敗已巳大雨雹庚午大雪十一

月流人楊武攻陷梁州十二月河東地震雨肉

二年春正月己巳朔黑霧著人如墨連夜五日乃止辛未庚時日隕于地又有三日相承出於西方而東行丁丑大赦楊武大略漢中遂奔李雄二月壬寅以司空王浚爲大司馬衛將軍荀組爲司空涼州刺史張軌爲大尉封西平郡公并州刺史劉琨爲大將軍三月癸酉石勒陷幽州殺侍中大司馬幽州牧博陵公王浚焚燒城邑害萬餘人杜弼別帥王眞龍表荊州刺史陶侃於林鄣侃奔潯中夏四月甲辰地震五月壬辰大尉領護羌校尉涼州刺史西平公張軌薨六月劉曜趙冉寇新豐諸縣安東將軍索綝討破之秋七月曜冉等又逼京都領軍將軍麴允討破之冉中流矢而死九月北中郎將劉寅剋頓丘斬石勒所署太守邵攀景戌麟見襄平單于代公猗盧遣使獻馬蒲子馬生人

三年春正月盜殺晉昌太守趙珮吳興太守徐馥害太守袁琇以待中宋哲爲平東將軍屯華陰二月景子進左丞相琅邪王濬爲大都督督中外諸軍事右丞相南陽王保爲相國司空荀組爲大尉大將軍劉琨爲

司空進封代公猗盧爲代王荊州刺史陶侃破王眞於巴陵杜弼別將杜弘張彥與臨川內史謝摛戰于海昏摛敗績死之三月豫章內史周訪擊杜弘走之斬張彥於陳夏四月大赦五月劉聰寇并州六月竇發漢霸杜二陵及薄太后陵太后面如生得金玉綵帛不可勝紀時以朝廷草創服章多闕勅收其餘以實內府丁卯地震辛巳大赦勅雍州掩骼埋胔修復陵墓有犯者誅及三族秋七月石勒陷濮陽害太守韓弘劉聰寇上黨劉琨遣將救之八月癸亥戰于襄垣王師敗績荊州刺史陶侃攻杜弼弼敗走道死湘州平九月劉曜寇北地命領軍將軍麴允討之冬十月允進攻青白城以豫州牧征東將軍索綝爲尚書僕射都督宮城諸軍事劉聰陷馮翊太守梁肅奔萬年十二月涼州刺史張寔送皇帝行璽一紐盜殺安定太守趙班

四年春三月代王猗盧薨其衆歸于劉琨夏四月丁丑劉曜寇上郡太守藉韋率其屬奔于南鄭涼州刺史張寔遣步騎五千來赴京都石勒陷廩丘北中郎將劉寅出奔五月平夷太守雷煥害南廣太守孟桓帥

二郡三千餘家叛降于李雄六月丁巳朔日有蝕之大蝗秋七月劉曜
攻北地麴允帥步騎三萬救之王師不戰而潰北地太守麴昌奔于京
師曜進至涇陽渭北諸城悉潰建威將軍曹充散騎常侍梁緯少府
皇甫陽等皆死之八月劉曜偪京師內外斷絕鎮西將軍焦嵩平東將
軍宋哲始平太守竺恢等同赴國難麴允與公卿守長安小城以自固
散騎常侍華輯監京兆馮翊弘農上洛四郡兵東屯霸上鎮軍將軍胡崧
帥城西諸郡兵屯遮馬橋並不敢進冬十月京師饑甚米斗金二兩人
相食死者大半太倉有麴數十麴麴允屑為粥以供帝至是復盡帝泣
謂允曰今窘厄如此外無救援死於社稷是朕事也朕念將士暴離斯
酷今欲聞城未陷為羞死之事庶令黎元免屠爛之苦行矣遣書朕意
決矣十月乙未使侍中宋敞送牋於曜帝乘羊車肉袒銜璧輿櫬出降
群臣號泣攀車執帝之手帝亦悲不自勝御史中丞吉朗自殺曜焚觀
受璧使宋敞奉帝還宮初有童謠曰天子何在豆田中時王浚在幽州
以豆有藿殺隱士霍原以應之及帝如曜營營實在城東豆田壁辛

丑帝蒙塵於平陽麴允及群官並從劉聰假帝光祿大夫懷安侯壬寅
聰臨殿帝枕首于前麴允伏地慟哭因自殺尚書辛賓梁允侍中梁濬
散騎常侍嚴敷左丞相臧振黃門侍郎任播張偉杜晏及諸郡守並為
曜所害華輯奔南山石勒圍樂平司空劉琨遣兵援之為勒所敗樂平
太守韓據出奔司空長史李弘以并州叛降于勒十二月甲申朔日有
蝕之己未劉琨奔薊依段匹磾

五年春正月帝在平陽庚子虹霓彌天三日並照平東將軍宋哲奔江
左李雄使其將李恭羅憲寇巴東二月劉聰使其將劉暢攻滎陽太守李
距擊破之三月琅邪王睿承制改元稱晉王於建康夏五月景子曰有
蝕之秋七月大旱司隸青瑤等四州蝨蝗石勒亦競取百姓禾時人謂
之胡蝗八月劉聰使趙固龔襲衛將軍華蓐於定穎遂害之冬十一月景
子曰有蝕之劉聰出獵令帝行車騎將軍戎服執戟為導百姓聚而觀
之故老或歔歔流涕聰聞而惡之聰後因大會使帝行酒洗爵反而更
衣又使帝執蓋晉臣在坐者多失聲耳而泣尚書郎辛賓抱帝慟哭為

聰所害十二月戊戌帝遇弒崩于平陽時年十八帝之繼皇統也屬永嘉之亂天下崩離長安城中戶不盈百牆宇積毀蒿棘成林朝廷無車馬章服唯桑版署號而已衆唯旅公私有車四乘器械多闕運饋不繼巨猾滔天帝京危急諸侯無釋位之志征鎮闕勤王之舉故君臣窘迫以至殺辱云

史臣曰昔炎暉杪暮英雄多假於宗室金德韜華顛沛共推於懷愍樊陽寂寥兵車靡會豈力不足而情有餘乎喋喋遺萌苟存其主壁後詩人愛其棠樹夫有非常之事而無非常之功詳觀發迹用非天啓是以輿棺齒劒可得而言焉子時五嶽三塗並皆淪寇龍川牛首故以立君股肱非挑戰之秋劉石有滔天之勢療饑中斷嬰戈外絕兩京淪狄再駕祖戎周王隕首於驪峯衛公亡肝於淇上思爲一郡其可得乎千寶有言曰昔高祖宣皇帝以雄才碩量應時而仕值魏太祖創基之初籌畫軍國嘉謀屢中遂服輿軫驅馳三世性深阻有若城府而能寬綽以容納行任數以御物而知人善采拔故賢愚咸懷大小畢力爾乃取鄧

艾於農瓚引州泰於行役委以文武各善其事故能西禽孟達東舉公孫內夷曹爽外龍袁王凌神略獨斷征伐四剋維御群后大權在已於是百姓與能大象始構世宗承基太祖繼業玄豐亂內欽誕寇外譖謀雖密而在機必非淮浦再擾而許洛不震咸黜異圖用融前列然後推轂鍾鄧長驅庸蜀三關電掃劉禪入臣天符人事於是信矣始當非常之禮終受備物之錫至于世祖遂享皇極仁以厚下儉以足用和而不弛寬而能斷故民詠惟新四海悅勸矣聿脩祖宗之志思輯戰國之苦腹心不同公卿異議而獨納羊祜之策杖王杜之決役不二時江湖來同掩唐虞之舊域班正朔於八荒天下書同文車同軌牛馬被野餘糧委畝故于時有天下無窮人之諺雖太平未洽亦足以明吏奉其法民樂其生矣武皇旣崩山陵未乾而楊駿被誅母后廢黜尋以二公楚王之變宗子無維城之助師尹無具瞻之貴至乃易太子以太上之號而有免官之謠民不見德惟亂是聞朝爲伊周夕成桀蹠善惡陷於成敗毀譽協於世利內外混淆庶官失才名實反錯天綱解紐國政迭移於

亂人禁兵外散於四方方岳無鈞石之鎮關內無結草之固李辰石冰
傾之於荆揚元海王弼撓之於青冀戎羯稱制三帝失尊何哉樹立失
權託付非才四維不張而苟且之政多也夫作法於治其弊猶亂作法於
亂誰能救之彼元海者離石之將兵都尉王弼者青州之散吏也蓋皆
弓馬之士驅走之人非有吳先主諸葛孔明之能也新起之寇烏合之
衆非吳蜀之敵也脫末爲兵裂裳爲旗非戰國之器也自下逆上非鄰
國之勢也然而擾天下如驅群羊舉一都如拾遺芥將相王侯連頸以
受戮后嬪妃主虜辱於戎卒豈不哀哉天下大器也群生重畜也愛惡
相攻利害相奪其勢常也若積水於防燎火于原未嘗暫靜也器大者
不可以小道治勢重者不可以爭競擾古先哲王知其然也是以扞其
大患禦其大災百姓皆知上德之生已而不謂浚已以生也是以感而
應之悅而歸之如晨風之鬱北林龍魚之趣藪澤也然後設禮文以理
之斷刑罰以威之謹好惡以示之審禍福以喻之求明察以宣至尊慈
愛以固之故衆知向方皆樂其生而哀其死悅其教而安其俗君子勤

禮小人盡力廉恥篤於家閭邪僻消於曾懷故其民有見其危以授命而不求生以害義又況可奮奮臂大呼聚之以千紀作亂乎基廣則難傾根深則難拔理節則不亂膠結則不遷是以昔之有天下者之所以長久也夫豈無僻王賴道德典刑以維持之也昔周之興也后稷生於姜嫄而天命昭顯文武之功起於后稷至于公劉遭夏人之亂去郤之邇身服厥勞至于太王爲戎習隹所逼而不忍百姓之命杖策而去之故從之者如歸市一年成邑二年成都三年五倍其初至于王季能貊其德音至于文王而惟新其命由此觀之周家世積忠厚仁及草木內隆九族外尊事黃耆以成其福祿者也而其妃后躬行四教尊敬師傅服澣濯之衣脩煩辱之事化天下以成婦道是以漢濱之女守絜白之志中林之士有純一之德始於憂勤終於逸樂以三聖之知伐獨夫之紂猶正其名教曰逆取順守及周公遭變陳后稷先公風化之所由致王業之艱難者則皆農夫女工衣食之事也故自后稷之始基靖民十五王而文始平之十六王而武始居之十八王而康克安之故其積基樹本經

緯禮俗節理人情恤隱民事如此之纏綿也今晉之興也功烈於百王
事捷於三代宣景遭多難之時誅庶孽以便事不及脩公劉大王之仁
也受遺輔政屢遇廢置故齊王不明不獲思庸于亳高貴沖人不得復
子明辟也二祖逼禪代之期不暇待參分八百之會也是其創基立本
異於先代者也加以朝寡純德之人鄉乏不貳之老風俗淫僻恥尚失
所學者以莊老爲宗而黜六經談者以虛蕩爲辨而賤名檢行身者以
放濁爲通而狹節信進仕者以苟得爲貴而鄙居正當官者以望空爲
高而笑勤恪是以劉頌屢言治道傳咸每糾邪正皆謂之俗吏其倚杖
虛曠依阿無心者皆名重海內若夫文王日旰不暇食仲山甫夙夜匪
懈者蓋其黜黜以爲灰塵矣由是毀譽亂於善惡之實情隱奔於貨欲
之塗選者爲人擇官官者爲身擇利而執鈞當軸之士身兼官以十數
大極其尊小錄其要而世族貴戚之子弟陵邁超越不拘資次悠悠風
塵皆奔競之士列官千百無讓賢之舉子真著崇讓而慕省子稚制
九班而不得用其婦女莊櫛織紵皆取成於婢僕未嘗知女工絲枲之

業中饋酒食之事也先時而婚任情而動故皆不恥淫佚之過不拘
妬忌之惡父兄不之罪也天下莫之非也又况責之聞四教於古修
貞順於今以輔佐君子者哉禮法刑政於此大壞如水斯積而決其
隄防如火斯蓄而離其薪燎也國之將亡本必先顛其此之謂乎故
觀阮籍之行而覺禮教崩弛之所由也察庾純賈充之爭而見師尹
之多僻考平吳之功而知將帥之不讓思郭欽之謀而寤戎狄有鬻
覽傳玄劉毅之言而得百官之邪核傳咸之奏錢神之論而覩寵賂
之彰民風國勢如此雖以中庸之才守文之主治之辛有必見之於
祭祀季札必得之於聲樂范曄必為之請死賈誼必為之痛哭又况
我惠帝以放蕩之德臨之哉懷帝承亂得位羈於彊臣愍帝奔播之
後徒廁其虛名天下之政既去非命世之雄才不能取之矣傳耀之
烈未渝故大命重集於中宗元皇帝

贊曰懷佩玉璽愍居黃屋鰲陸三山鯨吞九服獯入金商穹居未央
園顛盡仆方趾咸僵大夫反首徙我平陽主憂臣哭于何不臧

晉書帝紀卷第五

帝紀卷第六

晉書六

御撰

元帝

明帝

元皇帝諱睿字景文宣帝曾孫琅邪恭王觀之子也咸寧二年長於洛陽有神光之異一室盡明所藉蓐杲如始刈及長白豪生於日角之際進龍顏目有精曜顧眄焯如也年十五嗣位琅邪王幼有令問及惠皇之際王室多故帝每恭儉退讓以免于禍沉敏有度量不顯於然之迹故時人未之識焉惟侍中嵇紹異之謂人曰琅邪王毛骨非常殆非人臣之相也元康二年拜公負外散騎常侍累遷左將軍從討成都王穎蕩陰之敗也叔父東安王繇為穎所害帝懼禍及將出奔其夜月正明而禁衛嚴警帝无由得去甚窘迫有頃雲霧晦冥雷雨暮至徼者皆弛因得潛出穎先令諸關无得出貴人帝既至河陽為津吏所止從者宋典後來以策鞭帝馬而笑曰舍長官禁貴人汝亦被拘邪吏乃聽過至洛陽迎太妃俱歸國東海王越之收兵下邳也假帝輔國將軍尋加平東將軍監徐州諸軍事鎮下邳俄迁安東將軍都督揚州諸軍事越西迎

大駕留帝居守永嘉初用王導計始鎮建鄴以顧榮為軍司馬賀循為參佐王敦王導周顗刁協等為腹心股肱賓禮名賢存問風俗江東歸心焉屬太妃薨于國自表奔喪葬畢還鎮增封宣城郡二万户加鎮東大將軍開府儀同三司受越命討征東將軍周馥走之及懷帝蒙塵于平陽司空荀藩等移檄天下推帝為盟主江州刺史華軼不從使豫章內史周廣前江州刺史衛展討禽之愍帝即位加左丞相歲餘進位丞相大都督中外諸軍事遣諸將分定江東斬叛者孫弼於宣城平杜弢於湘州承制赦荆揚及西都不守帝出師露次躬擐甲胄移檄西方徵天下之兵剋日進討于時有玉冊見于臨安白麒麟神璽出於江寧其文曰長壽萬年日有重暈皆以為中興之象焉

建武元年春二月辛巳平東將軍宋哲至宣愍帝詔曰遭運迭否皇綱不振朕以寡德奉承洪緒不能祈天永命紹隆中興至使凶胡敢帥大羊逼迫京輦朕今幽塞窮城憂慮万端恐一旦崩潰卿指詎丞相具宣朕意使攝万機時據舊都修復陵廟以雪大恥三月帝素服出次率哀

三日西陽王羨及群僚叅佐州征牧守等上尊號帝不許羨等以死固請至于再三帝慨然流涕曰孤罪人也惟有蹈節死義以雪天下之恥庶贖鉄鉞之誅吾本琅邪王諸賢見逼不已乃呼私奴命駕將反國群臣乃不敢逼請依魏晉故事為晉王許之辛卯即王位大赦改元其殺祖父母父母及劉聰石勒不從此令諸叅軍拜奉車都尉掾屬駙馬都尉辟掾屬百餘人時人謂之百六掾乃備百官立宗廟社稷于建康時四方競上符瑞帝曰孤負四海之責未能思憊何徵祥之有景辰立世子紹為晉王太子以撫軍大將軍西陽王羨為大保征南大將漢安侯王敦為大將軍右將軍王導都督中外諸軍事驃騎將軍左長史刁協為尚書左僕射封王子宣成公襲為琅邪王六月景寅司空并州刺史廣武侯劉琨幽州刺史左賢王渤海公段匹磾鎮護烏丸校尉鎮北將軍劉翰單于廣甯公段辰遼西公段養翼州刺史祝阿子邵續青州刺史廣饒侯曹疑充州刺史定襄侯劉演東夷校尉崔毖鮮卑大都督慕容廆等一百八十人上書勸進曰臣聞天生蒸民樹之以君所以對越天

地司牧黎元聖帝明王監其若此知天地不可以乏饗食故屈其身以奉
之知蒸黎不可以无主故不得已而臨之社稷時難則戚藩定其傾郊
廟或替則宗哲纂其祀是以弘振遐風式固万世三五以降靡不由之
伏惟高祖宣皇帝肇基景命世祖武皇帝遂造區夏三葉重光四聖繼
軌惠澤侔於有虞卜世過於周氏自元康以來艱難繁興永嘉之際氛
厲弥昏宸極失御登遐醜裔國家之危有若綴旒賴先后之德宗廟之
靈皇帝嗣建舊物克甄誕授欽明服膺聰哲玉質幼彰金声夙振冢宰
攝其綱百辟輔其政四海想中興之美群生懷來蘇之望不圖天不悔
禍大災荐臻國未忘難寇害尋興逆胡劉曜縱逸西都敢肆大羊陵虐
天邑臣奉表使還乃承西朝以去年十月不守主上幽劫復沉虜庭
神器流離再辱荒逆臣每覽史籍觀之前載厄運之極古今未有苟在
食土之毛含血之類莫不叩心絕氣行號巷哭況臣等荷寵三世位廁
鼎司聞問震惶精爽飛越且驚且惋五情无主舉哀朔垂上下泣血臣
聞昏明迭用石秦相濟天命无改歷數有歸或多難以固邦國或躬憂以

啓聖明是以齊有無知之禍而小白爲五伯之長晉有麗姬之難而重耳以主諸侯之盟社稷靡安必將有以扶其危黔首幾絕必將有以繼其緒伏惟陛下玄德通於神明聖姿合於兩儀應命世之期紹千載之運符瑞之表天人有徵中興之兆圖讖垂典自京畿隕喪九服崩離天下蹢然無所歸懷雖有夏之遘夷羿宗姬之離犬戎蔑以過之陛下撫征江左奄有舊吳柔服德伐叛以刑抗明威以攝不類杖大順以號宇內純化旣敷則率土宅心義風旣暢則遐方企踵百揆時叙於上四門穆穆於下昔少康之隆夏訓以爲美談宣王中興周詩以爲休詠況茂勲格于皇天清暉光于四海蒼生顛然莫不欣戴聲教所加願爲臣妾者哉且宣皇之胤惟有陛下億兆攸歸曾無與二天祚大晉必將有主主晉祀者非陛下而誰是以邇無異言遠無異望謳歌者無不吟諷徽猷獄訟者無不思于聖德天地之際旣交華裔之情允洽一角之獸連理之木以爲休徵者蓋有百數冠帶之倫要荒之衆不謀同辭者動以萬計是以臣等敢考天地之心因函夏之趣味死上尊號願陛下存

舜禹至公之情狹由巢抗矯之節以社稷為務不以小行為先以黔首
為憂不以克讓為事上慰宗廟乃顧之懷下釋普天傾首之勤則所謂
生繁華於枯萸育豐肌於朽骨神人獲安無不幸甚臣聞尊位不可以
虛萬機不可以曠虛之一日則尊位以殆曠之浹辰則萬機以亂方今踵
百王之季當陽九之會狡寇窺窬伺國瑕隙黎元波蕩無所繫心安可
廢而不恤哉陛下雖欲逡巡其若宗廟何其若百姓何昔者惠公虜秦
晉國震駭呂卻之謀欲立子圉外以絕敵人之志心內以固闔境之情故
曰喪君有君群臣輯睦好我者勸惡我者懼前事之不忘後代之元龜
也陛下明並日月無幽不燭深謀遠猷出自宵懷不勝犬馬憂國之情
遲覩人神開泰之路是以陳其乃誠布之執事臣等忝於方任久在遐
外不得陪列闕廷與覩盛禮踊躍之懷南望罔極帝優令荅之語在琨
傳石勒將石季龍圍譙城平西將軍祖逖擊走之己巳帝傳檄天下曰
逆賊石勒肆虐何朔逋誅靡載游魂縱逸復遣凶黨石季龍犬羊之衆
越河南渡縱其鳩毒平西將軍祖逖帥衆討擊應時潰散今遣車騎將

軍琅邪王裒等九軍銳卒三萬水陸四道徑造賊場受馭節度有能梟
季龍首者賞絹三千匹金五十斤封縣侯食邑二千戶又賊黨能梟逆
季龍首封賞亦同之七月散騎侍郎朱嵩尚書郎顧球卒帝痛之將為
舉哀有司奏舊尚書郎不在舉哀之例帝曰裒亂之弊特相痛悼於是
遂舉哀哭之甚慟丁未梁王曄薨以太尉荀組為司徒弛山澤之禁八
月甲午封梁王世子翹為梁王荊州刺史第五猗為賊帥杜曾所推遂
與曾同反九月戊寅王敦使武昌太守趙誘襄陽太守朱軌陵江將軍
黃峻討猗為其將杜曾所敗誘等皆死之石勒害京北太守華諝梁州
刺史周訪討杜曾大破之十月丁未琅邪王裒薨十一月甲子封汝南
王子弼為新蔡王丁卯以司空劉琨為太尉置史官立太學是歲揚州大旱
○太興元年春正月戊申朔臨朝懸而不樂三月癸丑愍帝崩問至帝斬
綬居廬景辰百寮上尊號令曰孤以不德當厄運之極巨節未立匡救
未舉夙夜所以忘寢食也今宗廟廢絕億兆無係群官庶尹咸勉之
以大政亦何以辭輒敬從所執是日即皇帝位詔曰昔我高祖宣皇帝

誕應期運廓開王基景文皇帝升世重光緝熙諸夏爰暨世祖應天順
時受茲明命功格天地仁濟宇宙昊天不融降此鞠凶懷帝短世越去
王都天禍荐臻大行皇帝崩殂社稷無奉肆群后三司六事之人疇諮
庶允至于華戎致輯大命于朕躬余一人畏天之威用弗敢違遂登壇
南嶽受終文祖焚柴頒瑞告類上帝惟朕寡德續我洪緒若涉大川罔
知攸濟惟爾股肱爪牙之佐文武熊羆之臣用能弼寧晉室輔余一人
思與萬國共同休慶於是大赦改元文武增位二等庚午立王太子紹
爲皇太子壬申詔曰昔之爲政者動人以行不以言應天以實不以文
故我清靜而人自正其次聽言觀行明試以功其有政績可述刑獄得
中人無怨訟久而日新及當官軟弱茹柔吐剛行身穢濁脩飾時譽署
各以名聞令在事之人仰鑒前烈同心勗力深思所以寬衆息役惠益
百姓無廢朕命遠近禮贄一切斷之夏四月丁丑朔日有蝕之加大將
軍王敦江州牧進驃騎將軍王導開府儀同三司戊寅初禁招魂葬乙
酉西平地震五月癸丑使持節侍中都督太尉并州刺史廣武侯劉琨

為段匹磾所害六月旱帝親雩改丹楊內史為丹楊尹甲申以尚書左僕射刁協為尚書令平南將軍曲陵公荀松為尚書左僕射庚寅以滎陽太守李矩為都督司州諸軍事司州刺史戊戌封皇子晞為武陵王初置諫鼓謗木秋七月戊申詔曰王室多故姦凶肆暴皇綱弛墜顛覆大猷朕以德統承洪緒夙夜憂危思改其弊二千石令長當祇奉舊憲正身明法抑齊豪強存恤孤獨隱實戶口勸課農桑州牧刺史當互相檢察不得顧私虧公長吏有志在奉公而不見進用者有貪恡穢濁而以財勢自安者若有不舉當受故縱蔽善之罪有而不知當受闇塞之責各明慎奉行劉聰死其子粲嗣偽位八月龔徐青三州蝗斬準弑劉粲自號漢王冬十月癸未加廣州刺史陶侃平南將軍劉曜僭即皇帝位于赤壁十一月乙卯日夜出高三丈中有赤青珥新野王弼薨加大將軍王敦荊州牧庚申詔曰朕以寡德纂承洪緒上不能調和陰陽下不能濟育群生災異屢興咎徵仍見壬子乙卯雷震暴雨蓋天災譴誡所以彰朕之不德也群公卿士其各上封事具陳得失無有所諱將親覽焉新作聽訟觀故歸命侯孫皓子

璠謀反伏誅十二月劉聰故將王騰馬忠等誅斬準送傳國璽於劉曜武昌地震丁丑封顯義亭侯倭爲琅邪王己卯琅邪王漢薨癸巳詔曰漢高經大梁美無忌之賢齊師入曾脩柳下惠之墓其吳之高德名賢或未旌錄者具脩列以聞江東三郡饑遣使賑給之彭城內史周撫殺師國內史周默以反

二年春正月丁卯崇陽陵毀帝素服哭三日使冠軍將軍梁湛守太常馬龜等脩復山陵迎梓宮于平陽不剋而還二月太山太守徐龕斬周撫傳首京師夏四月龍驤將軍陳川以俊儀叛降於石勒太山太守徐龕以郡叛自號兗州刺史寇濟岱秦州刺史陳安叛降于劉曜五月癸丑太陽陵毀帝素服哭三日徐揚及江西諸郡蝗吳郡大饑平北將軍祖逖及石勒將石季龍戰于浚儀王師敗績壬戌詔曰天下凋弊加以災荒百姓困窮國用並匱吳郡饑乏死者百數天生蒸黎而樹之以君選建明哲以左右之當深思以救其弊昔吳起於楚悼王明法審令損不急之官除廢公族疎遠以附益將士而國富兵彊況今日之弊百姓周困邪且當去非急之

務非軍事所須者皆省之甲子梁州刺史周訪及杜曾戰於武當斬之禽第五猗六月景子加周訪安南將軍罷御府及諸郡承置博士貢五人己亥加太常賀循開府儀同三司秋七月乙丑太常賀循卒八月肅慎獻楛矢石磐徐龕寇東莞遣太子左衛率羊鑒行征虜將軍統徐州刺史蔡豹討之冬十月平北將軍祖逖使督護陳超龔石勒將桃豹超敗沒於陣十月戊寅石勒僭即王位國號趙十二月乙亥大赦詔百官各上封事并省衆役鮮卑慕容廆襲遼東東夷校尉平州刺史崔毖奔高句驪是歲南陽王保稱晉王於祁山三吳大饑

三年春正月丁酉朔晉王保爲劉曜所逼遷于桑城二月辛未石勒將石季龍寇馱次平北將軍翼州刺史邵續擊之續敗沒於陣三月慕容廆奉送王璽三紐閏月以尚書周顗爲尚書僕射夏四月壬辰枉矢流于翼軫五月景寅孝懷帝太子詮遇害于平陽帝三日哭庚寅地震是月晉王保爲其將張春所害劉曜使陳安攻春滅之安因叛曜石勒將徐龕帥衆來降六月大水丁酉盜殺西中郎將護羌校尉涼州刺史西

平張公寔寔弟茂嗣領平西將軍涼州刺史秋七月丁亥詔曰先公武
正先考恭王臨君琅邪四十餘年惠澤加於百姓遺愛結於人情朕應
天符創基江表兆庶宅心權負子來琅邪國人在此者近有千戶今立
爲懷德縣統丹楊郡昔漢高祖以沛爲湯沐邑光武亦復南頓優復之
科一依漢氏故事祖逖部將衛策大破石勒別軍於汴水加逖爲鎮西
將軍八月戊午尊敬王石虞氏爲敬皇后辛酉遷神主于太廟辛未梁
州刺史安南將軍周訪卒皇太子釋奠于太學以湘州刺史甘卓爲安
南將軍梁州刺史九月徐龕又叛降于石勒冬十月景辰徐州刺史蔡
豹以畏懦伏誅王敦殺武陵內史向碩

四年春二月徐龕又帥衆來降鮮卑末波奉送皇帝信爾庚戌告于太
廟乃受之癸亥日闕三月置周易儀禮公羊博士癸酉以平東將軍曹
嶷爲安東將軍夏四月辛亥帝親覽庶獄石勒攻厭次陷之撫軍將軍
幽州刺史段匹磾沒于勒五月旱庚申詔曰昔漢二祖及魏武皆免良人
武帝時涼州覆敗諸爲奴婢亦皆復籍此累代成規也其免中州良人

遭難為揚州諸郡僮客者以備征役秋七月大水申戌以尚書戴若思為征西將軍都督司兗豫并冀雍六州諸軍事司州刺史鎮合肥丹陽尹劉隗為鎮北將軍都督青徐幽平四州諸軍事青州刺史鎮淮陰壬午以驃騎將軍王導為司空八月常山崩九月壬寅鎮西將軍豫州刺史祖逖卒冬十月壬午以逖弟侍中約為平西將軍豫州刺史十二月以慕容廆為持節都督幽平二州東夷諸軍事平州牧封遼東郡公

永昌元年春正月乙卯大赦改元戊辰大將軍王敦舉兵於武昌以誅劉隗為名龍驤將軍沈充帥眾應之三月徵征西將軍戴若思鎮北將軍劉隗還衛京都以司空王導為前鋒大都督以戴若思為驃騎將軍丹楊諸郡皆加軍號加僕射周顗尚書左僕射領軍王邃尚書右僕射以太子右衛率周逖行冠軍將軍統兵三千討沈充甲午封皇子昱為琅邪王劉隗軍于金城右將軍周札守石頭帝親被甲徇六師於郊外遣平南將軍陶侃領江州安南將軍甘卓領荊州各帥所統以躡敦後四月敦前鋒攻石頭周札開城門應之奮威將軍侯禮死之敦據石頭

戴若思劉隗帥衆攻之王導周顗郭逸虞潭等三道出戰六軍敗績尚書令刁協奔于江乘爲賊所害鎮北將軍劉隗奔于石勒遣使謂敦曰公若不忘本朝於此息兵則天下尚可共安也如其不然朕當歸於琅邪以避賢路辛未大赦敦乃自爲丞相都督中外諸軍錄尚書事封武昌郡公邑萬戶景子驃騎將軍秣陵侯戴若思尚書左僕射護軍將軍武城侯周顗爲敦所害敦將沈充陷吳國魏乂陷湘州吳國內史張茂湘州刺史譙王承並遇害五月壬申敦以太保西陽王羨永爲太宰加司空王導尚書令乙亥鎮南大將軍甘卓爲襄陽太守周慮所害蜀賊張龍寇巴東建平太守柳純擊走之石勒遣騎寇河南六月旱秋七月王敦自加兖州刺史郗鑒爲安北將軍石勒將石季龍攻陷太山執守將徐龕兖州刺史郗鑒自鄒山退守合肥八月敦以其兄含爲衛將軍自領寧益三州郡都督琅邪太守孫默叛降于石勒冬十月大疫死者十三已丑都督荆梁二州諸軍事平南將軍荊州刺史武陵侯王廙卒辛卯以下邳內史王邃爲征北將軍都督青徐幽平四州諸軍事鎮淮

陰新昌太守梁碩起兵反京師大霧黑氣蔽天日月無光石勒攻陷襄城城父遂圍譙破祖約別軍約退據壽春十月以司徒荀組爲太尉已西太尉荀組薨罷司徒并丞相閏月己丑帝崩于內殿時年四十七葬建平陵廟號中宗帝性簡儉仲素容納直言虛已待物初鎮江東頗以酒廢事王導深以爲言帝命酌引觴覆之於此遂絕有司嘗奏太極殿廣室施絳帳帝曰漢文集上書曰曩爲帷遂令冬施青布夏施青練帷帳將拜貴人有司請市雀釵帝以煩費不許所幸鄭夫人衣無文綵從母弟王廙爲母立屋過制流涕止之然晉室遘紛皇輿播越天命未改人謀叶贊元戎屢動不出江畿經略區區僅全吳楚終於下陵上辱憂憤告謝恭儉之德雖充雄武之量不足始秦時望氣者云五百年後金陵有天子氣故始皇東游以厭之改其地曰秣陵漸北山以絕其勢及孫權之稱號自謂當之孫盛以爲始皇逮于孫氏四百二十七載考其歷數猶爲未及元帝之渡江也乃五百二十六年真人之應在於此矣咸寧初風吹太社樹折社中有青氣占者以爲東莞有帝者之祥由是徙

封東莞王於琅邪即武王也及吳之亡王濬實先至建鄴而皓之降款
遠歸璽於琅邪天意人事又符中興之兆太安之際童謠云五馬浮渡
江一馬化爲龍及永嘉中歲鎮熒惑太白聚牛女之間識者以爲吳越
之地當興王者是歲王室淪覆帝與西陽汝南南頓彭城五王獲濟而
帝竟登大位焉初立石圖有牛繼馬後故宣帝深忌牛氏遂爲二楹共
一口以貯酒焉帝先飲佳者而以毒酒鳩其將牛金而恭王妃夏侯氏
竟通小吏牛氏而生元帝亦有符云

史臣曰晉氏不虞自中流外五胡扛鼎七廟隳尊滔天方駕則民懷其
舊德者矣昔光武以數郡加名元皇以一州臨極豈武宣餘化猶暢於
琅邪文景垂仁傳芳於南頓所謂後乎天時先諸人事者也馳章獻號
高蓋成陰星斗呈祥金陵表慶陶士行擁三州之旅郢外以安王茂弘
爲分陝之計江東可立或高旌未拂而遐心斯偃迴首朝陽仰希乾棟
帝猶六讓不居七辭而不免也布帳練帷詳刑簡化抑揚前軌光啓中
興古者私家不畜甲兵大臣不爲威福王之常制以訓股肱中宗失馭

疆臣自土齊斧兩京胡羯風埃相望雖復六月之駕無聞而鴻鴈之歌
方遠享國無幾哀哉

明皇帝諱紹字道畿元皇帝長子也幼而聰哲為元帝所寵異年數歲
嘗坐置膝前屬長安使來因問帝曰汝謂日與長安孰遠對曰長安近
不聞人從日邊來居然可知也元帝異之明日宴群僚又問之對曰日
近元帝失色曰何乃異間者之言對曰舉目則見日不見長安由是益
奇之建興初拜東中郎將鎮廣陵元帝為晉王立為晉王太子及帝即
尊號立為皇太子性至孝有文武才略欽賢愛客雅好文辭當時名臣
自王導庾亮溫嶠桓彝阮放等咸見親待嘗論聖人具假之意導等不
能屈又習武藝善撫將士于時東朝濟濟遠近屬心焉及王敦之亂六
軍敗績帝欲帥將士決戰升車將出中庶子溫嶠固諫抽劔斬鞅乃止
敦素以帝神武明略朝野之所欽信欲誣以不孝而廢焉大會百官而
問溫嶠曰皇太子以何德稱聲色俱厲必欲使有言嶠對曰鉤深致遠
蓋非淺局所量以禮觀之可稱為孝矣眾皆以為信然敦謀遂止

永昌元年閏月己丑元帝崩庚寅太子即皇帝位大赦尊所生荀氏為建安郡君

太寧元年春正月癸巳黃霧四塞京師火李雄使其將李驤任回寇臺登將軍司馬玖死之越巂太守李釗漢嘉太守王載以郡叛降于驤二月葬元帝于建平陵帝徒跣至于陵所以特進華恒為驃騎將軍都督石頭水陸軍事乙丑黃霧四塞景寅隕霜至申又隕霜殺穀三月戊寅朔改元臨軒停饗宴之禮懸而不樂景戌隕霜殺草饒安東光安陵三縣災燒七千餘家死者萬五千人石勒攻陷下邳徐州刺史卞敦退保盱眙王敦獻皇帝信爾王紐敦將謀篡逆諷朝廷徵已帝乃手詔徵之夏四月敦下屯于湖轉司空王導為司徒自領揚州牧巴東監軍柳純為敦所害以尚書陳眈為都督幽平二州諸軍事幽州刺史五月京師大水李驤等寇寧州刺史王遜遣將姚岳距戰於堂狼大破之梁碩攻陷文州刺史王諒死之六月王子立皇后庾氏平南將軍陶侃遣參軍高寶攻梁碩斬之傳首京師進侃位征南大將軍開府儀同三司秋七

月景子朔震太極殿柱是月劉曜攻陳安於龍城滅之八月以安北將軍郗鑒為尚書令石勒將石季龍攻陷青州刺史曹嶷遇害冬十月王敦以其兄征南大將軍含為征東將軍都督揚州江西諸軍事以軍國饑乏調刺史以下米各有差

二年春正月丁丑帝臨朝停饗宴之禮懸而不樂庚辰赦五歲刑以下術人李脫造妖書惑眾斬于建康市石勒將石季龍寇兖州刺史劉遐自彭城退保泗口三月劉曜將康平寇魏興及南陽夏五月王敦矯詔拜其子應為武衛將軍兄含為驃騎大將軍帝所親信常從督公乘雄舟曾並為敦所害六月敦將舉兵內向帝密知之乃乘巴滇駿馬微行至于湖陰察敦營壘而出有軍士疑帝非常人又敦正晝寢夢日環其城驚起曰此必黃鬚鮮卑奴來也帝母荀氏燕代人帝狀類外氏鬚黃敦於謂帝云於是使五騎物色追帝帝亦馳去馬有遺糞輒以水灌之見逆旅賣食嫗以七寶鞭與之曰後有騎來可以此示也俄而追者至問嫗嫗曰去已遠矣因以鞭示之五騎傳玩愁言留遂久又見馬糞冷以

為信遠而止不追帝僅而獲免丁卯加司徒王導大都督假節領揚州
刺史以丹楊尹溫嶠為中壘將軍與右將軍下敦守石頭以光祿勳應
詹為護軍將軍假節督朱雀橋南諸軍事以尚書令郗鑒行衛將軍
都督從駕諸軍事以中書監庾亮領左衛將軍以尚書下壺行中軍將
軍徵平北將軍徐州刺史王邃平西將軍豫州刺史祖約北中郎將兗
州刺史劉遐奮武將軍臨淮太守蘇峻奮威將軍廣陵太守陶瞻等還
衛京師帝次于中堂秋七月壬申朔敦遣其兄含及錢鳳周撫鄧岳等
水陸五萬至于南岸溫嶠移屯水北燒朱雀桁以挫其鋒帝躬率六軍
出次南皇堂至癸酉夜募壯士遣將軍段秀中軍司馬曹渾左衛參軍
陳嵩鍾寅等甲卒千人渡水掩其未畢平旦戰於越城大破之斬其前
鋒將何康王敦憤惋而死前宗正虞潭起義師於會稽沈充帥萬餘人
來會含等庚辰築壘于陵口丁亥劉遐蘇峻等帥精卒萬人以至帝夜
見勞之賜將士各有差義興人周蹇殺敦所署太守劉芳平西將軍祖
約逐敦所署淮南太守任台于壽春乙未賊衆濟水護軍將軍應詹帥

建威將軍趙胤等距戰不利賊至宜陽門北中郎將劉遐蘇峻等自南塘橫擊大破之劉遐又破沈充于青溪景申賊燒營宵遁丁酉帝還宮大赦惟敢黨不原於是分遣諸將追其黨與悉平之封司徒王導為始興郡公邑三千戶賜綰九千匹丹楊尹溫嶠建寧縣公尚書卞壺建興縣公中書監庾亮永昌縣公北中郎將劉遐泉陵縣公奮武將軍蘇峻邵陵縣公邑各二千八百戶綰各五千四百匹尚書令郗鑒高平縣侯護軍將軍應詹觀陽縣侯邑各千六百戶綰各四千八百匹建威將軍趙胤湘南縣侯右將軍下敦益陽縣侯邑各千六百戶綰各三千二百匹其餘封賞各有差冬十月以司徒王導為太保領司徒太宰西陽王承領太尉應詹為平南將軍都督江州諸軍事江州刺史劉遐為監淮北諸軍事徐州刺史庾亮為護軍將軍詔王敦群從一無所問是時石勒將石生屯洛陽豫州刺史祖約退保壽陽十二月壬子帝謁建平陵從大祥之禮梁水太守麋亮益州太守李暹以興古叛降于李雄沈充故將顧鵬反於武康攻燒城邑州縣討斬之

三年春二月戊辰復三族刑惟不殺婦人三月幽州刺史段末波卒以弟牙嗣戊辰辛皇子衍為皇太子大赦增文武位二等大酺三日賜鰥寡孤獨帛人二疋癸巳徵虜士臨海任旭會稽虞奎並為博士夏四月詔曰大事初定其命惟新其令太宰司徒已下詣都坐參議政道諸所因革務盡事中又詔曰滄直言引亮正想郡賢達吾此懷矣予違汝弼堯舜之相君臣也吾雖虛闇庶不距逆耳之談稷契之任君居之矣望共勗之己亥雨雹石勒將石良寇兖州刺史檀贊力戰死之將軍李矩等並衆潰而歸石勒盡陷司兗豫三州之地五月以征南大將軍陶侃為征西大將軍都督荆湘雍梁四州諸軍事荊州刺史王舒為安南將軍都督廣州諸軍事廣州刺史六月石勒將石季龍攻劉曜將劉岳於新安陷之以廣州刺史王舒為都督湘中諸軍事湘州刺史湘州刺史劉顥為平越中郎將都督廣州諸軍事廣州刺史大旱自正月不雨至于是月秋七月辛未以尚書令郗鑒為車騎將軍都督青兖三州諸軍事假節鎮廣陵領軍將軍下壺為尚書令詔曰三恪二王世代之所重興滅繼

絕政道之所先又宗室哲王有功勲於大晉受命之際者佐命功臣碩
德名賢三祖所與共維大業咸開國胙土誓同山河者而並廢絕禋祀
不傳甚用懷傷王者其詳議諸應立後者以聞又詔曰郊祀天地帝王
之重事自中興以來惟南郊未曾北郊四時五郊之禮都不復設五嶽
四瀆名山大川載在祀典應望秩者悉廢而未舉王者其依舊詳處八
月詔曰昔周武克殷封比干之墓漢祖過趙錄樂毅之後追顯既往以
勸將來也吳時將相名賢之胄有能纂脩家訓又忠孝仁義靜已守真
不聞於時者州郡中正亟以名聞勿有所遺閏月以尚書左僕射荀崧
為光祿大夫錄尚書事尚書鄧攸為尚書左僕射壬午帝不忿切召太
宰西陽王義司徒王導尚書令卞壺車騎將軍郗鑒護軍將軍庾亮領
軍將軍陸曄丹楊尹溫嶠並受遺詔輔太子丁亥詔曰自古有死賢聖
所同壽夭窮達歸於一既亦何足特痛哉朕枕疾已久常慮忽然仰惟
祖宗洪基不能克終堂構大恥未雪百姓塗炭所以有慨耳不幸之日
歛以時服一遵先度務從簡約勞衆崇飾皆勿為也衍以幼弱猥當大

重當賴忠賢訓而成之昔周公匡輔成王霍氏擁育孝昭義存前典功冠二代豈非宗臣之道乎凡此公卿時之望也敬聽顧命任託付之重同心斷金以謀王室諸方獄征鎮刺史將守皆朕扞城推轂於外雖事有內外其致一也故不有行者誰扞牧圉譬若唇齒表裏相圍宜勸力一心若合符契思美焉之美以緝事為期百辟卿士其愬已以聽於冢宰保祐冲幼弘濟艱難永令祖宗之靈寧於九天之上則朕沒于地下無恨黃泉戊子帝崩于東堂年二十七葬武陵廟號肅祖帝聰明有機斷尤精物理于時兵凶歲饑死疫過半虛弊既甚事極艱虞屬王敦挾震主之威將移神器帝崎嶇遵養以弱制強潛謀獨斷廓清大侵尋改授荆湘等四州以分上流之勢撥亂反正強本弱枝雖饗國曰淺而規模弘遠矣

史臣曰維揚作寓馮帶洪流楚江恒戰方城對敵不得不推誠將相以揔戎麾樓船萬計兵倍王室處其利而無心者周公其人也威權外假嫌隙內興彼有順流之師此無強藩之援商逢九亂堯止八音明皇資

圖屬在茲日運龍韜於掌握起天旆於江靡燎其餘燼有若秋原去
縷經而踐戎場斬鯨鯢而拜園闕鎮削威權州分江漢覆重不踐貽厥
孫謀其後七十餘年終罹敬道之害或曰興亡在運非止上流豈創
制不殊而弘之者異也

贊曰傾天起害猛獸呈災琅邪之子仁義歸來龍行趙壁命筆王榮切
荆臺雲瞻北晦江望南開晉陽禦敵河西全壤胡寇雖艱靈心弗爽
三方馳騖百重從轡宣室命還昌金輝載助明后岐嶷重書接要莽首
晨懸董臍昏燎厥德不回餘風可劭

帝紀卷第六

晉書六



帝紀卷第七

晉書七

成帝

康帝



御撰

成皇帝諱衍字世根明帝長子也太寧三年三月戊辰立為皇太子閏
月戊子明帝崩己丑太子即皇帝位大赦增文武位二等賜鰥寡孤
帛人二匹尊皇后庾氏為皇太后秋九月癸卯皇太后臨朝稱制司徒
王導錄尚書事與中書令庾亮參輔朝政以撫軍將軍南頓王宗為驃
騎將軍領軍將軍汝南王祐為衛將軍辛丑葬明帝于武平陵冬十一月
癸巳朔日有蝕之廣陵相曹渾有罪下獄死

咸和元年春二月丁亥大赦改元大酺五日賜鰥寡孤老米人二斛京
師百里內復一年夏四月石勒遣其將石生寇汝南汝南人執內史祖
濟以叛甲子尚書左僕射鄧攸卒夏大水六月癸亥時持節散騎常
侍監淮北諸軍事北中郎將徐州刺史泉陵公劉遐卒癸酉以車騎將
軍郗鑒領徐州刺史征虜將軍郭默為北中郎將假節監淮北諸軍劉
遐部曲將李龍史迭奉遐子肇代遐位以距默臨太守劉矯擊破之斬

龍傳首京師秋七月癸丑使持節都督江州諸軍事江州刺史平南將軍觀陽伯應詹卒八月以給事中前將軍丹楊尹溫嶠爲平南將軍假節都督江州刺史九月旱李雄將張龍寇涪陵執太守謝俊冬十月封魏武帝玄孫曹勣爲陳留王以紹魏景寅衛將軍汝南王祐薨己巳封皇帝岳爲吳王車騎將軍南頓王宗有罪伏誅貶其族爲馬氏免太宰西陽王羨降爲弋陽縣王庚辰赦百里內五歲以下刑是月劉曜將黃秀帛成寇鄯平北將軍魏該帥衆奔襄陽十一月壬子大閱於南郊改定王侯國秩九分食一石勒將石聰攻壽陽不剋遂侵遂適阜陵加司徒王導大司馬假黃鉞都督中外征討諸軍事以禦之歷陽太守蘇峻遣其將韓晃討石聰走之時大旱自六月不雨至于是月十二月濟嶠太守劉闔殺下邳內史夏侯嘉叛降石勒梁王勰薨

二年春正月寧州秀才龐遺起義兵攻李雄將任回李謙等雄遣其將羅恒費黑救之寧州刺史尹奉遣裨將姚岳朱提太守楊術援遺戰于臺登岳等敗績術死之三月益州地震夏四月旱己未豫章地震五月

甲申朔日有蝕之景戌加豫州刺史祖約為鎮西將軍戊子京師大水
冬十月劉曜使其子胤侵枹罕遂略河南地十一月豫州刺史祖約歷陽
太守蘇峻等反十二月辛亥蘇峻使其將韓晃入姑孰屠于湖王子彭
城王雄章武王休叛奔峻庚申京師戒嚴假護軍將軍庾亮節為征討
都督以右衛將軍趙胤為冠軍將軍歷陽太守使與左將軍司馬流帥
師距峻戰于慈湖流敗死之假驍騎將軍鍾雅節帥舟軍與趙胤為前鋒
以距峻丙寅徙封琅邪王昱為會稽王吳王岳為琅邪王辛未宣城內史桓
彝及峻戰于蕪湖彝軍敗績車騎將軍郗鑒遣廣陵相劉矩帥師赴京師
三年春正月平南將軍溫嶠帥師救京師次于尋陽遣督護王愆期西
陽太守鄧嶽鄱陽太守紀睦為前鋒征西大將軍陶侃遣督護龔登受
嶠節度鍾雅趙胤等次慈湖王愆期鄧嶽等次直瀆丁未峻濟自橫江
登牛渚二月庚戌峻至于蔣山假領軍將軍下壺節帥六軍及峻戰于
西陵王師敗績景辰峻攻青溪柵因風縱火王師又大敗尚書令領軍
將軍下壺丹楊尹羊曼黃門侍郎周道等廬江太守陶瞻並遇害死者數

千人庾亮又敗于宣陽門內遂擣其諸弟與鄭默趙胤奔尋陽於是司徒王導右光祿大夫陸曄荀崧等衛帝於大極殿太常孔愉守宗廟賊乘勝麾戈接於帝座突入太后後宮左右侍人皆見掠奪是時太官唯有燒餘米數石以供御膳百姓號泣鄉音震都邑丁巳峻矯詔大赦又以祖約爲侍中太尉尚書令自爲驃騎將軍錄尚書事吳郡太守庾冰奔于會稽三月景子皇太后庾氏崩夏四月石勒攻宛南陽太守王國叛降于勒壬申葬明穆皇后于武平陵五月乙未峻逼遷天子于石頭帝哀泣升車宮中慟哭峻以倉屋爲宮遣管商張瑾弘微寇晉陵韓晃寇義興吳興太守虞潭與庾冰王舒等起義兵於三吳景午征西大將軍陶侃平南將軍溫嶠護軍將軍庾亮平北將軍魏該舟軍四萬次于蔡州六月韓晃攻宣城內史桓彝力戰死之壬辰平北將軍雍州刺史魏該卒于師廬江太守毛寶攻賊合肥戎拔之秋七月祖約爲石勒將石聰所攻衆潰奔于歷陽石勒將石季龍攻劉曜於蒲坂八月曜及石季龍戰于高候季龍敗績曜遂圍石生於洛陽九月戊申司徒王導奔于

白石庚午陶侃使督護楊謙攻峻于石頭溫嶠庾亮陣于白石竟陵太守李陽距賊南偏峻輕騎出戰墜馬斬之衆遂大潰賊黨復立峻弟逸爲帥前交州刺史張璉據始興反進攻廣州鎮南司馬曹勰等擊破之冬十月李雄將張龍寇涪陵太守趙弼沒於賊十二月乙未石勒敗劉曜於洛陽獲之是歲石勒將石季龍攻氐帥蒲洪於隴山降之

四年春正月帝在石頭賊將匡術以苑城歸順百官赴焉侍中鍾雅右衛將軍劉超謀奉帝出爲賊所害戊辰冠軍將軍趙胤遣將甘苗討祖約于歷陽敗之約奔于石勒其將牽騰帥衆降峻子碩攻臺城又焚太極東堂祕閣皆盡城中大饑米斗萬錢三月大雨霖景戌諸軍攻石頭李陽與蘇逸戰於祖浦陽軍敗建威長史滕含以銳卒擊之逸等大敗含奉帝御于溫嶠舟群臣頓首號泣請罪弋陽王秉有罪伏誅丁亥大赦時兵火之後宮闕灰燼以建平園爲宮甲午蘇逸以萬餘人自延陵湖將入吳興乙未將軍王允之及逸戰于溧陽獲之王寅以湘州并荊州劉曜大子毗與其大司馬劉胤帥百官奔于上邽關中大亂三月壬子

以征西大將軍陶侃為太尉封長沙郡公車騎將軍都鑒為司空封南昌縣公平南將軍溫嶠為驃騎將軍開府儀同三司封始安郡公其餘封拜各有差庚午以右光祿大夫陸曄為衛將軍開府儀同三司復封高密王紘為彭城王以護軍將軍庾亮為平西將軍都督揚州之宣城江西諸軍事假節領豫州刺史鎮蕪湖夏四月乙未驃騎將軍始安公溫嶠卒秋七月有星孛于西北會稽吳興宣城丹楊大水詔復遭賊郡縣租稅三年八月劉曜將劉胤等帥眾侵石生次于雍九月石勒將石季龍擊胤斬之進屠上邽盡滅劉氏坑其黨三千餘人冬十月廬山崩十二月壬辰右將軍郭默害平南將軍江州刺史劉胤太尉陶侃帥眾討默是歲天裂西北○五年春正月乙亥大赦癸亥詔除諸將任子二月以尚書陸玩為尚書左僕射孔愉為右僕射夏五月旱且饑疫乙卯太尉陶侃擒郭默于尋陽斬之石勒將劉微寇南沙都尉許儒遇害進入海虞六月癸巳初稅田畝三升秋八月石勒僭即皇帝位使其將郭敬寇襄陽南中郎將周撫退歸武昌中州流人悉降于勒郭敬遂寇襄陽屯于樊城九月造新宮

始繕苑城甲辰徙樂成王欽爲河間王封彭城王紘子浚爲高密王冬十月丁丑辛司徒王導第置酒大會李雄將李壽寇巴東建平監軍母丘奧太守陽謙退歸宜都十二月張駿稱臣於石勒

六年春正月癸巳劉徵復寇婁縣遂掠武進乙未進司空郗鑒都督吳國諸軍事戊午以運漕不繼發王公已下千餘丁各運米六斛三月巳丑以幽州刺史大單于段遼爲驃騎將軍三月壬戌朔日有蝕之癸未詔舉賢良直言之士夏四月巳未景申徙故河間王顥爵位封彭城王植子融爲樂成王章武王混子珍爲章武王秋七月李雄將李壽侵陰平武都氏帥楊難敵降之八月庚子以左僕射陸琬爲尚書令

七年春正月辛未大赦三月西中郎將趙胤司徒中郎匠術攻石勒馬頭塢剋之勒將韓雍寇南沙及海虞夏四月勒將郭敬陷襄陽五月大水秋七月景辰詔諸養獸之屬損費者多一切除之太尉陶侃遣子平西叅軍斌與南中郎將桓宣攻石勒將郭敬破之剋樊城竟陵太守李陽拔新野襄陽因而戍之冬十一月壬子朔進太尉陶侃爲大將軍詔

舉賢良十二月庚戌帝遷于新宮

八年春正月辛亥朔詔曰昔大賊縱暴宮室焚蕩元惡雖翦未暇營
築有司屢陳朝會逼狹遂作斯宮子來之勞不日而成既獲臨御大鄉食
群后九賓充庭百官象物知君子勤禮小人盡力矣思蠲密網咸同斯
惠其赦五歲刑以下令諸郡舉力人能舉千五百斤以上者景寅李雄
將李壽偕寧州刺史尹奉乃建寧太守霍彪並降之癸酉以張駿為鎮西
大將軍景子石勒遣使致賂詔焚之夏四月詔封故新蔡主弼弟邈為新
蔡主以東帛徵處士尋陽翟湯會稽虞喜五月有星隕于肥鄉麒麟
騶虞見于遼東乙未車騎將軍遼東公慕容廆卒子皝嗣位六月甲辰
撫軍將軍王舒卒秋七月戊辰石勒死子弘嗣偽位其將石聰以譙來降冬
十月石弘將石生起兵於關中稱秦州刺史遣使來降石弘將石季龍攻
石劭於洛陽因進擊石生俱滅之十二月石生故部將郭權遣使請降
乙丑春正月隕石于涼州二以郭權為鎮西將軍雍州刺史二月丁卯加
鎮西大將軍張駿為大將軍三月丁酉會稽地震夏四月石弘將石季

龍使石斌攻郭權於郿陷之六月李雄死其兄子班嗣僞位乙卯大尉
長沙公陶侃薨大旱詔太官徹膳省刑恤孤寡貶費節用辛未加平西
將軍庾亮都督江荆豫益梁雍六州諸軍事秋八月大雪自五月不雨
至于九月九月戊寅散騎常侍衛將軍江陵公陸曄卒冬十月李雄子
期弑李班而自立班弟珩與其將焦會羅凱等並來降十一月石季龍
弑石弘自立為天王十二月丁卯以東海王沖為車騎將軍琅邪王岳
為驃騎將軍蘭陵人朱縱斬石季龍將郭祥以彭城來降

咸康元年春正月庚午朔帝加元服大赦改元增文武位一等大酺三日
賜鰥寡孤獨不能自存者米人五斛二月甲子帝親釋奠揚州諸郡饑
遣使賑給三月乙酉幸司徒府夏四月癸卯石季龍寇歷陽加司徒王
導大司馬假黃鉞都督征討諸軍事以禦之癸丑帝觀兵于廣莫門分
命諸將遣將軍劉仕救歷陽平西將軍趙胤屯茲湖龍驤將軍路永戍
牛渚建武將軍王允之戍蕪湖司空郗鑒使廣陵相陳光帥衆衛京師
賊退向襄陽戊午解嚴石季龍將石遇寇中廬南中郎將王國退保襄

陽秋八月長沙武陵大水東帛徵處士翟湯郭翻冬十月乙未朔日有蝕之是歲大旱會稽餘姚尤甚米斗五百價人相賣

二年春正月辛巳彗星見于奎以吳國內史虞潭爲衛將軍二月筭軍用稅米空懸五千餘萬石尚書謝襄已下免官辛亥立皇后杜氏大赦增文武位一等庚申高句驪遣使貢方物三月旱詔太官減膳免所旱郡縣繇役戊寅大雩夏四月丁巳皇后見于太廟雨雹秋七月揚州會稽饑開倉賑給冬十月廣州刺史鄧嶽遣督護王隨擊夜郎新昌太守陶協擊興古並剋之詔曰歷觀先代莫不褻崇明祀賓禮三恪故祀宋啓土光于周典宗姬侯衛垂美漢冊自頃喪亂庶邦殄悴周漢之後絕而莫繼其詳求衛公山陽公近屬有履行脩明可以繼承其祀者依舊典施行新作朱雀浮桁十一月遣建威將軍司馬勳安集漢中爲李期將李壽所敗三年春正月辛卯立太學夏六月旱冬十月丁卯慕容皝自立爲燕王四年春二月石季龍帥衆七萬擊段遼于遼西遼奔于平崗夏四月李壽弑李期僭即僞位國號漢石季龍爲慕容皝所敗癸丑加皝征北大

將軍五月乙未以司徒王道守爲大傅都督中外諸軍事司空郗鑒爲太尉征西將軍庾亮爲司空六月改司徒爲丞相以太傅王道守爲之秋八月景午分寧州置安州

五年春正月辛丑大赦三月乙丑廣州刺史鄧嶽伐蜀建寧人王孟彥執李壽將霍彪以降夏四月辛未征西將軍庾亮遣叅軍趙松擊平巴郡江陽獲石季龍將李閔黃桓等秋七月庚申使持節侍中丞相領揚州刺史始興公王道薨辛酉以護軍將軍何充錄尚書事八月壬午復改丞相爲司徒辛酉太尉南昌公郗鑒薨九月石季龍將夔安李農陷沔南張貉陷邾城因寇江夏義陽征虜將軍毛寶西陽太守樊俊義陽太守鄭進並死之夔安等進圍石城竟陵太守李陽距戰破之斬首五千餘級安乃退遂略漢東擁七千餘家遷于幽異冬十二月景戌以驃騎將軍琅邪王岳爲司徒李壽將李弈寇巴東守將勞揚戰敗死之六年春正月庚子使持節都督江豫益梁雍交廣七州諸軍事司空都亭侯庾亮薨辛亥以左光祿大夫陸玩爲司空三月慕容皝及石季龍

將石成戰于遼西敗之獻捷于京師庚辰有星孛于太微三月丁卯大赦以車騎將軍東海王沖爲驃騎將軍李壽陷丹川守將孟彥劉齊李秋皆死之秋七月乙卯初依中興故事朔望聽政於東堂冬十月林邑獻馴象十月癸卯復琅邪比漢豐沛

七年春二月甲午朔日有蝕之己卯慕容皝遣使成假燕王章璽許之三月戊戌杜皇后崩夏四月丁卯葬恭皇后于興平陵實編戶王公已下皆正土斷白籍秋八月辛酉驃騎將軍東海王沖薨九月罷太僕官冬十二月癸酉司空興平伯陸玩薨除樂府雜伎罷安州

八年春正月己未朔日有蝕之乙丑大赦三月初以武悼夏皇后配饗武帝廟夏六月庚寅帝不念詔曰朕以眇年獲嗣洪緒託于公王之上於茲十有八年未能闡融政道剪除逋侵夙夜戰兢匪遑寧處今遘疾殆不興是用震悼于厥心千齡眇眇未堪艱難司徒琅邪王岳親則母弟體則仁長君人之風允塞時望肆爾王公卿士其輔之以祗奉祖宗明祀協和內外允執其中嗚呼敬之哉無彖祖宗之顯命壬辰引武陵王

晞會稽王昱中書監庾冰中書令何充尚書令諸葛恢並受顧命癸巳
帝崩于西堂時年二十一葬興平陵廟號顯宗帝少而聰敏有成人之
量南頓王宗之誅也帝不之知及蘇峻平問周庾亮曰常曰白頭公何
在亮對以謀反伏誅帝泣謂亮曰舅言人作賊便殺之人言舅作賊復
若何亮懼變色庾惔嘗送酒於江州刺史王允之允之與犬犬斃懼而
表之帝怒曰大舅已亂天下小舅復欲爾邪惔聞飲藥而死然少爲
舅氏所制不親庶政及長頗留心萬機務在簡約常欲於後園作射堂
計用四十金以勞費乃止雄武之度雖有媿於前王恭儉之德足追蹤
於往烈矣

康皇帝諱岳字世同成帝母弟也咸和元年封吳王二年徙封琅邪王
九年拜散騎常侍加驃騎將軍咸康五年遷侍中司徒八年六月庚寅
成帝不念詔以琅邪王爲嗣癸巳成帝崩甲午即皇帝位大赦諸屯戍
文武及二千石官長不得輒離所局而來奔赴己亥封成帝子丕爲琅
邪王丕爲東海王時帝諒陰不言委政于庾冰何充秋七月景辰葬成

皇帝于興平陵帝親奉奠於西階既發引徒行至閭闔門升素輿至
於陵所已未以中書令何充爲驃騎將軍八月辛丑彭城王絃薨以江
州刺史王允之爲衛將軍九月詔琅邪國及府吏進位各有差冬十月
甲午衛將軍王允之卒十二月增文武位二等壬子立皇后褚氏
建元元年春正月改元賑恤鰥寡孤獨三月以中書監庾永爲車騎將
將軍夏四月益州刺史周撫西陽太守曹據伐李壽敗其將李恒于江
陽五月旱六月壬午又以東帛徵勳士南陽翟湯會稽虞喜有司奏成
帝崩一周請改素服御進膳如舊壬寅詔曰禮之降殺因時而寢興誠
無常矣至於君親相準名教之重莫之改也權制之作蓋出近代雖曰
適事實敝矣薄之始先王崇之後世猶怠而況因循又從輕降義弗可矣
石季龍帥衆伐慕容皝皝大敗之秋七月石季龍將戴開帥衆來降丁
巳詔曰慕容皝摧殄羯寇乃云死没八萬餘人將是其天亡之始也中
之事且加籌量且戴開已帥部黨歸順宜見慰勞其遣使詣安西驃
騎諮謀諸軍事以輔國將軍琅邪內史桓溫爲前鋒小督假節帥衆入

臨淮安西將軍庾翼爲征討大都督遷鎮襄陽庾申晉陵吳郡火八月李壽死于勢嗣僞位石季龍使其將劉寧攻陷狄道冬十月辛巳以車騎將軍庾冰都督荆江司雍益梁六州諸軍事江州刺史以驃騎將軍何充爲中書監都督揚豫二州諸軍事揚州刺史錄尚書事輔政以琅邪內史桓溫都督青徐兗三州諸軍事徐州刺史褚裒爲衛將軍領中書令十月己巳大赦十二月石季龍侵張駿駿使其將軍謝艾拒之大戰于河西季龍敗績十二月高句驪遣使朝獻

二年春正月張駿遣其將和麟謝艾討南羌于闐和大破之二月慕容皝及鮮卑帥宇文歸戰于昌黎歸衆大敗奔于漠北四月張駿將張瓘敗石季龍將王擢于三交城秋八月景子進安西將軍庾翼爲征將軍庾辰持節都督司雍梁三州諸軍事梁州刺史平北將軍竟陵公桓宣卒丁巳以衛將軍褚裒爲特進都督徐兗二州諸軍事兗州刺史鎮金城九月巴東太守楊謙擊李勢勢將申陽交之獲其將樂高景申立皇子明爲皇太子戊戌帝崩于式乾殿時年二十二葬崇平陵初成帝有疾

中書令庾冰自以舅氏當朝權侔人主恐異世之後戚屬將踈乃言國有疆敵宜立長君遂以帝爲嗣制度年號再興中朝因改元曰建元或謂冰曰郭璞識云立始之際丘山傾立者建也始者元也丘山諱也冰瞿然旣而歎曰如有吉凶豈改易所能救乎至是果驗云

史臣曰肆虐滔天豈伊朝夕若乃詳刑不怨庶情猶仰又可以見逆順之機焉成帝因削弱之資守江淮之地政出渭陽聲垂威服凶徒旣縱神器阽危京華無教庾之資宮室類咸陽之火桀大吠堯封狐嗣亂方諸后羿曷若斯之甚也反我皇駕不有晉文之師繫于苞桑且賴陶公之力古之侯服不幸臣家天子宣遊則避宮北面聞諸遺策用爲恒範顯宗於王導之門歛依前拜豈魯公受玉之卑乎帝亦克儉于躬庶能激揚流弊者也

贊曰惟皇夙表余舅爲毗勤於致寇拙於行師火及君屋兵纏帝帷石頭之駕海內含悲康后天資居哀禮縉墜典方興降齡奚促

晉書帝紀卷第七

帝紀卷第八

晉書八

御撰

穆帝

哀帝

海西公

穆皇帝諱聃字彭子康帝子也建元二年九月景申立爲皇太子戊戌康帝崩己亥太子卽皇帝位時年二歲大赦尊皇后爲皇太后壬寅皇太后臨朝攝政冬十月乙丑葬康皇帝于宗平陵十一月庚辰車騎將軍庾亮卒○永和元年春正月甲戌朔皇太后設白紗帷於太極殿抱帝臨軒改元甲申進鎮軍將軍武陵王晞爲鎮軍大將軍開府儀同三司以鎮軍將軍顧衆爲尚書右僕射夏四月壬戌詔會稽王昱錄尚書六條事五月戊寅大雩尚書令金紫光祿大夫建安伯諸葛恢卒六月癸亥地震秋七月庚午持節都督江荆司梁雍益寧七州諸軍事江州刺史征西將軍都亭侯庾翼卒翼部將干瑣戴羲等殺冠軍將軍曹據舉兵反安西司馬朱燾討平之八月豫州刺史路永叛奔于石季龍庾辰以輔國將軍徐州刺史桓溫爲安西將軍持節都督荆司雍益梁寧六州諸軍事鎮護南蠻校尉荊州刺史石季龍將路永屯于壽春九月景申皇太后詔

曰今百姓勞弊其共思詳所以振卹之宜及歲常調非軍國要急者並宜停之冬十二月李勢將麋顏來奔涼州牧張駿伐焉者降之

二年春正月景寅大赦己卯使持節侍中都督揚州諸軍事揚州刺史驃騎將軍錄尚書事都鄉侯何充卒二月癸丑以左光祿大夫蔡謨領司徒錄尚書六條事撫軍大將軍會稽王昱及謨並輔政三月景子以前司徒左長史殷浩為建武將軍揚州刺史夏四月己酉朔日有蝕之五月景戌涼州牧張駿卒子重華嗣六月石季龍將王擢襲武街執張重華護軍胡宣又使麻秋孫伏都伐金城太守張冲降之重華將謝艾擊秋敗之秋七月以兖州刺史褚裒為征北大將軍開府儀同三司冬十月地震十一月辛未安西將軍桓溫帥征虜將軍周撫輔國將軍譙王無忌建武將軍袁喬伐蜀拜表輒行十二月枉矢自東南流于西北其長半夫

三年春三月乙卯桓溫攻成都剋之丁亥李勢降益州平林邑范文攻陷日南害太守夏侯覽以戶祭天夏四月地震蜀人鄧定隗文舉兵反

桓溫又擊破之使益州刺史周撫鎮彭模丁巳鄧定隗文等入據成都
征虜將軍楊謙棄涪城退保德陽五月戊申進慕容皝爲安北將軍石
季龍又使其將石寧麻秋等伐涼州次于曲柳張重華使將軍牛旋御之
退守枹罕六月辛酉大赦秋七月范文復陷日南害督護劉雄隗文立
范賁爲帝八月戊午張重華將謝艾進擊麻秋大敗之九月地震冬十
月乙丑假涼州刺史張重華大都督隴右關中諸軍事護羗校尉大將
軍武都氐王楊初爲征南將軍雍州刺史平羗校尉仇池公並假節十
二月振威護軍蕭敬文害征虜將軍楊謙攻涪城陷之遂取巴西通于
漢中

四年夏四月范文寇九德多所殺害五月大水秋八月進安西將軍桓
溫爲征西大將軍開府儀同三司封臨賀郡公西中郎將謝尚爲安西
將軍九月景申慕容皝死子儁嗣僞位冬十月己未地震石季龍使其
將符健寇竟陵十二月豫章人黃韜自號孝神皇帝聚衆數千寇臨川
太守庾條討平之

五年春正月辛巳朔大赦庚寅地震石季龍僭即皇帝位於鄴二月征
北大將軍褚裒使部將王龕北伐獲石季龍將支重夏四月益州刺史
周撫龍驤將軍朱燾擊范賁獲之益州平封周撫為建城公假慕容
儁大將軍幽平二州牧大戰于燕王征西大將軍桓溫遣督護滕畋討
范文為文所敗石季龍死子世嗣偽位五月石遵廢世而自立六月桓
溫屯安陸遣諸將討河北石遵揚州刺史王浹以壽陽來降秋七月褚
裒進次彭城遣部將王龕李邁及石遵將李農戰于代陂王師敗績王
龕為農所執李邁死之八月褚裒退屯廣陵西中郎將陳達焚壽春而
遁梁州刺史司馬勳攻石遵長城戍仇池公楊初龍襄西城皆破之冬十
月石遵將石遇攻宛陷之執南陽太守郭啟司馬勳進次懸鉤石季龍
故將麻秋拒之勳退還梁州十一月景辰石鑒弑石遵而自立十二月
己丑使持節都督徐兗二州諸軍事徐州刺史征北大將軍開府儀同
三司都鄉侯褚裒卒以建武將軍吳國內史荀羨為使持節監徐兗二
州諸軍事北中郎將徐州刺史

六年春正月帝臨朝以褚裒喪故懸而不樂閏月冉閔弑石鑒僭稱天王國號魏鑒弟祗僭帝號于襄國丁丑慧昌見于元己丑加中軍將軍殷浩督揚豫徐兗青五州諸軍事假節叅師苻洪遣使來降以爲氏王封廣川郡公假洪子健節監河北諸軍事右將軍封襄國縣公三月石季龍故將麻秋鴈殺苻洪子枋頭夏五月大水廬江太守袁真攻合肥剋之六月石祗遣其弟琨攻冉閔將王泰於邯鄲琨師敗績秋八月輔國將軍誰王無忌薨苻健帥衆入關冬十一月冉閔圍襄國十二月免司徒蔡謨爲庶人是歲大疫

七年春正月丁酉日有蝕之辛丑鮮卑段龕以青州來降苻健僭稱王國號秦三月戊寅以段龕爲鎮北將軍封齊公石祗大敗冉閔于襄國夏四月梁州刺史司馬勳出步騎三萬自漢中入秦川與苻健戰于五丈原王師敗績加尚書令顧和開府儀同三司劉顯弑石祗五月祗充州刺史劉啓自鄆城來奔秋七月尚書令左光祿大夫開府儀同三司顧和卒甲辰濤水入石頭溺死者數百人八月冉閔豫州牧張遇以許

昌來降拜鎮西將軍九月峻陽太陽二陵崩甲辰帝素服臨於太極殿
三日遣兼太常趙拔脩復山陵冬十月雷雨震電十月石祗將姚弋
仲冉閔將魏脫各遣使來降以弋仲為車騎將軍大單于封高陵郡公
弋仲子襄為平北將軍都督并州諸軍事并州刺史平鄉縣公脫為安
北將軍監冀州諸軍事冀州刺史十二月辛未征西大將軍桓溫帥眾
北伐次于武昌而止時石季龍故將周成屯廩丘高昌屯野王樂立屯
許昌李歷屯衛國皆相次來降

八年春正月辛卯日有蝕之劉顯僭帝號於襄國冉閔擊破殺之苻健
僭帝號於長安二月峻平崇陽二陵崩戊辰帝臨三日遣殿都尉王惠
如洛陽以衛五陵鎮西將軍張遇反於許昌使其黨上官恩據洛陽樂
弘攻督護戴施於倉垣三月使北中郎將荀羨鎮淮陰苻健別帥侵順
陽太守薛珍擊破之夏四月冉閔為慕容儁所滅儁僭帝號於中山稱
燕安西將軍謝尚帥姚襄與張遇戰於許昌之誠橋王師敗績苻健使
其弟雄龍來遇虜之秋七月大雪石季龍故將王擢遣使請降拜鎮西將

軍秦州刺史丁酉以鎮軍大將軍武陵王晞為大宰撫軍大將軍會稽王昱為司徒征西大將軍桓溫為太尉八月平西將軍周撫討蕭衍文於涪城斬之冉閔子智以鄴降督護戴施獲其傳國璽送之文曰受天之命皇帝壽昌百僚畢賀九月冉智為其將馬願所執降于慕容恪中軍將軍鄒浩帥眾北伐次泗口遣河南太守戴施據石門滎陽太守劉遂成倉垣冬十月秦州刺史王擢為苻健所逼奔于涼州

九年春正月乙卯朔大赦張重華使王擢與苻健將苻雄戰擢師敗績景宣皇太后與帝同拜建平陵三月旱交州刺史阮敷討林邑范佛於日南破其五十餘壘夏四月以安西將軍謝尚為尚書僕射五月大疫張重華復使王擢襲秦州取之仇池公楊初為苻雄所敗秋七月丁酉地震有聲如雷八月遣兼太尉河間王欽修復五陵冬十月中軍將軍鄒浩進次山桑使平北將軍姚襄為前鋒襄叛反擊浩浩棄輜重退保譙城丁未涼州牧張重華卒子耀靈嗣是月張祚弑耀靈而自稱涼州牧十月鄒浩使部將劉啟王彬之討姚襄復為襄所敗襄遂進據枹陂

十二月加尚書僕射謝尚爲都督豫揚江西諸軍事領豫州刺史鎮歷陽
○十年春正月己酉朔帝臨朝以五陵未復懸而不樂涼州牧張祚僭帝
位冉閔降將周成舉兵反自宛陵襲洛陽辛酉河南太守戴施奔鮪渚
丁卯地震有聲如雷二月己丑太尉征西將軍桓溫帥師伐關中廢揚
州刺史殷浩爲庶人以前會稽內史王述爲揚州刺史夏四月己亥溫及
苻健子萇戰于藍田大敗之五月江西乞活郭敞等執陳留內史劉仕
而叛京師震駭以吏部尚書周閔爲中軍將軍屯于中堂豫州刺史謝
尚自盩陽還衛京師六月苻健將苻雄悉衆及桓溫戰于白鹿原王師
敗績秋九月辛酉桓溫糧盡引還

十年春正月甲辰侍中汝南王統薨平羌校尉仇池公楊初爲其部
將梁式所害初子國嗣位因拜鎮北將軍秦州刺史齊公段龔襲慕容
儁將榮國於郎山取之夏四月壬申隕霜乙酉地震姚襄帥衆寇外黃
冠軍將軍高季大破之五月丁未地震六月苻健死其子生嗣僞位
秋七月宋混張瓘弑張祚而立耀靈弟玄靚爲大將軍涼州牧遣使來

降以吏部尚書周閔為尚書左僕射領軍將軍王彪之為尚書右僕射
冬十月進豫州刺史謝尚督并冀幽三州諸軍事鎮西將軍鎮馬頭十二
月慕容恪帥眾寇廣固壬戌上黨人馮鴛自稱太守背苻生遣使來降
○十二年春正月丁卯帝臨朝以皇太后母喪縣而不樂鎮北將軍段龕
及慕容恪戰于廣固大敗之恪退據安平二月辛丑帝講孝經三月姚
襄入于許昌以太尉桓溫為征討大都督以討之秋八月己亥桓溫及
姚襄戰於伊水大敗之襄走平陽徙其餘眾三千餘家於江漢之間執
周成而歸使揚武將軍毛穆之督護陳午輔國將軍河南太守戴施鎮
洛陽冬十月癸巳朔日有蝕之慕容恪攻段龕於廣固使北中郎將荀
羨帥師次于琅邪以救之十月遣兼司空散騎常侍車灌龍驤將軍
袁真等持節如洛陽脩五陵十二月庚戌以有事於五陵告于太廟帝
及群臣皆服總於太極殿臨三日是歲仇池公楊國為其從父俊所殺
俊自立

升平元年春正月壬戌朔帝加元服告于太廟始親萬機大赦改元增

文武位一等皇太后居崇德宮丁丑隕石于槐里一是月鎮北將軍齊公段龕為慕容恪所陷遇害扶南天竺旃檀獻馴象詔曰昔先帝以殊勾異獸或為人患禁之今及其未至可令還本土三月帝講孝經壬申親釋奠於中堂夏五月庚午鎮西將軍謝尚卒苻生將苻堅擊姚襄戰于三原斬之六月苻堅殺苻生而自立以軍司謝奕為使持節都督安西將軍豫州刺史秋七月苻堅將張平以并州降遂以為并州刺史八月丁未立皇后何氏大赦賜孝悌鰥寡米之五斛逋租宿債皆勿收大酺三日冬十月皇后見于太廟十一月雷十二月以太常王彪之為尚書左僕射

二年春正月司徒會稽王昱稽首歸政帝不許二月慕容儁陷冀州諸郡詔安西將軍謝弈北中郎將荀羨北伐三月攸飛督王饒獻鳩鳥帝怒鞭之二百使殿中御史焚其鳥於四達之衢夏五月大水有星孛于天船六月并州刺史張平為苻堅所逼帥眾三千奔于平陽堅追敗之慕容恪進據上黨冠軍將軍苻鴛以眾叛歸慕容儁儁盡陷河北之地

秋八月安西將軍謝弈卒壬申以吳興太守謝万爲西中郎將持節監司豫冀并四州諸軍事豫州刺史以散騎常侍郗曇爲北中郎將持節都督徐充青冀幽五州諸軍事徐充州刺史鎮下邳冬十月乙丑陳留王曹勵薨十一月庚子雷辛西地震十二月北中郎將荀羨及慕容儁戰于山茌王師敗績

三年春三月甲辰詔以比年出軍糧運不繼五公已下十三戶借人一年助運秋七月平北將軍高昌爲慕容儁所逼自白馬奔于滎陽冬十月慕容儁寇東阿遣西中郎謝万次下蔡北中郎將郗曇次高平以擊之王師敗績十月戊子進揚州刺史王述爲衛將軍十二月又以中軍將軍琅邪王丕爲驃騎將軍東海王弈爲車騎將軍封武陵王晞子璿爲梁王交州刺史溫放之帥兵討林邑衆黎耽潦並降之

四年春正月仇池公楊俊卒子世嗣景戌慕容儁死子暉嗣僞位二月鳳皇將九鸞見于豐城秋七月以軍役繁興省用徹膳八月辛丑朔日有蝕之既冬十月天狗流于西南十一月封太尉桓溫爲南郡公溫弟冲

為豐城縣公子濟為臨賀郡公鳳凰復見豐城衆鳥隨之

五年春正月戊戌大赦賜鰥寡孤獨不能自存者人米五斛北中郎將都督徐充青冀幽五州諸軍事徐充二州刺史郗曇卒二月以鎮軍將軍范汪為都督徐充青冀幽五州諸軍事安北將軍徐充二州刺史平南將軍廣州刺史陽夏侯滕含卒夏四月大水太尉桓溫鎮宛使其弟豁將兵取許昌鳳凰見于沔北五月丁巳帝崩于顯陽殿時年十九葬永安陵廟號孝宗

哀皇帝諱丕字千齡成帝長子也咸康八年封為琅邪王永和元年拜散散常侍十二年加中軍將軍升平三年除驃騎將軍五年五月丁巳穆帝崩皇太后令曰帝奄不救疾胤嗣未建琅邪王丕中興正統明德懋親昔在咸康屬當儲貳以年在幼冲未堪國難故顯宗高讓今義望情地莫與為比其以王奉大統於是百官備法駕迎于琅邪第庚申即皇帝位大赦壬戌詔曰朕獲承明入纂大統顧惟先王宗廟蒸嘗無主太妃喪庭廓然靡寄悲痛感摧五內抽割宗國之尊情禮兼隆胤嗣之

重義無與二東海王奔戚屬親近宜奉本統其以奔為琅邪王秋七月
戊午葬穆皇帝于永平陵慕容恪攻陷野王守將呂護退保滎陽八月
己卯夜天裂廣數丈有聲如雷九月戊申立皇后王氏穆帝皇后何氏
稱永安宮呂護叛奔于慕容暉冬十月安北將軍范汪有罪廢為庶人
十一月景辰詔曰顯宗成皇帝顧命以時事多艱弘高世之風樹德博
重以隆社稷而國故不已康穆早世胤祚不融朕以寡德復承先緒感
惟求慕悲痛兼摧夫昭穆之義固宜本之天屬繼躋承基古今常道宜
上嗣顯宗以脩本統十一月加涼州刺史張玄靚為大都督隴右諸軍事
護羌校尉西平公

隆和元年春正月壬子大赦改元甲寅減田稅畝收二升是月慕容暉
將呂獲傳末波攻陷小壘以逼洛陽二月辛未以輔國將軍吳國內史
庾希為北中郎將徐兗二州刺史鎮下邳前鋒監軍龍驤將軍袁真為
西中郎將監護豫司并異四州諸軍事豫州刺史鎮汝南並假節景子
尊所生周氏為皇太妃三月甲寅朔日有蝕之夏四月旱詔出輕繫振

困乏丁丑梁州地震浩豐山崩呂護復寇洛陽乙酉輔國將軍河南太守戴施奔于宛五月丁巳遣北中郎將庾希竟陵太守鄧遐以舟師救洛陽秋七月呂護等退守小平津進琅邪王奔為侍中驃騎大將軍開府鄧遐進屯新城庾希部將何謙及慕容暉將劉則戰于檀丘破之八月西中郎將袁真進次汝南運米五万斛以饋洛陽冬十月賜貧乏者米人五斛章武王珍薨十二月戊午朔日有蝕之詔曰戎旅路次未得輕簡賦役玄象失度元旱為患豈政事未洽有版築渭濱之士邪其搜揚隱滯蠲除苛碎詳議法令咸從損要庾希自下邳退鎮山陽袁真自汝南退鎮壽陽

興寧元年春二月己亥大赦改元三月壬寅皇太妃薨于琅邪第癸卯帝奔喪詔司徒會稽王昱摠內外衆務夏四月慕容暉寇滎陽太守劉遠奔魯陽甲戌揚州地震湖濱溢五月加征西大將軍桓溫侍中大司馬都督中外諸軍事錄尚書事假黃鉞復以西中郎將袁真都督司隸并三州諸軍事北中郎將庾希都督青州諸軍事癸卯慕容暉陷密城

柴陽太守劉遠奔于江陵秋七月張天錫弑涼州刺史西平公張玄靚
自稱大將軍護羌校尉涼州牧西平公丁酉葬章皇太妃八月有日食于
角亢入天市九月壬戌大司馬桓溫帥衆北伐癸亥以皇子生大赦
冬十月甲申立陳留王世子恢爲王十一月姚襄故將張駿殺江州督
護趙毗焚武昌略府藏以叛江州刺史桓沖討斬之是歲慕容暉將慕容
塵攻陳留太守袁披于長平汝南太守朱斌承虛襲許昌剋之

二年春二月庚寅江陵地震慕容暉將慕容評襲許昌潁川太守李福
死之評遂侵汝南太朱斌遁于壽陽又進圍陳郡太守朱輔嬰城固守
桓溫遣江夏相劉祐擊退之改左軍將軍爲游擊將軍罷右軍前軍後
軍將軍五校三將官癸卯帝親耕籍田三月庚戌朔大閱戶人嚴法禁
稍爲庚戌制辛未帝不念帝雅好黃老斷穀餌長生藥服食過多遂中
毒不識萬機崇德太后復臨朝攝政夏四月甲辰慕容暉遣其將李洪
侵許昌王師敗績于懸瓠朱斌奔于淮南朱輔退保彭城桓溫遣西中
郎將袁真江夏相劉祐等鑿陽儀道以通運溫帥舟師次于合肥慕容

塵復屯許昌五月遷陳人于陸以避之戊辰以揚州刺史王述爲尚書
令衛將軍以桓溫爲揚州牧錄尚書事王申遣使喻溫入相溫不從秋
七月丁卯復徵溫入朝八月溫至赭圻遂城而居之苻堅別帥侵河南
慕容暉寇洛陽九月冠軍將軍陳祐留長史沈勁守洛陽帥衆奔新城
○三年春正月庚申皇后王氏崩二月乙未以右將軍桓豁監荊州揚州
之義城雍州之京兆諸軍事領南蠻校尉荊州刺史桓沖監江州荊州
之江夏隨郡豫州之汝南西陽新蔡潁川六郡諸軍事南中郎將江州
刺史領南蠻校尉並假節景申帝崩于西堂時年二十五葬安平陵
廢帝諱弈字延齡哀帝之母弟也咸康八年封爲東海王永和八年拜
散騎常侍尋加鎮軍將軍升平四年拜車騎將軍五年改封琅邪王隆
和初轉侍中驃騎大將軍開府儀同三司興寧三年二月景申哀帝崩
無嗣丁酉皇太后詔曰帝遂不救厥疾艱禍仍臻遺緒泯然哀慟切心
琅邪王弈明德茂親屬當儲嗣宜奉祖宗纂承大統便速正大禮以寧
人神於是百官奉迎于琅邪第是日即皇帝位大赦三月壬申葬哀皇

帝于安平陵癸酉散騎常侍何間王欽薨景子慕容暉將慕容恪陷洛陽寧朔將軍竺瑤奔于襄陽冠軍長史楊武將軍沈勁死之夏六月戊子使持節都督益寧三州諸軍事鎮西將軍益州刺史建城公周撫卒秋七月匈奴左賢王衛辰右賢王曹毅帥衆二萬侵苻堅杏城己酉改封會稽王昱爲琅邪王王子立皇后庾氏封琅邪王昱子昌明爲會稽王冬十月梁州刺史司馬勲反自稱成都王十月帥衆入劔閣攻涪西夷校尉母丘暉棄城而遁乙卯圍益州刺史周楚于成都桓溫遣江夏相朱序救之十二月戊戌以會稽內史王彪之爲尚書僕射

太和元年春二月己丑以涼州刺史張天錫爲大將軍都督隴右關中諸軍事西平郡公景申以宣城內史桓秘爲持節監梁益三州征討諸軍事三月辛亥新蔡王邈薨荊州刺史桓豁遣督護桓胤攻南鄭魏興人畢欽舉兵以應胤夏四月旱五月戊寅皇后庾氏崩朱序攻司馬勲於成都衆潰執勲斬之秋七月癸酉葬孝皇后于敬平陵九月甲午曲赦梁益三州冬十月辛丑苻堅將王猛楊安攻南鄉荊州刺史桓豁救

之師次新野而猛安退以會稽王昱爲丞相十二月南陽人趙弘趙意等據宛城反太守桓澹走保新野慕容暉將慕容厲陷魯郡高平二年春正月北中郎將庾希有罪走入于海夏四月慕容暉將慕容塵寇竟陵太守羅崇擊破之苻堅將王猛寇涼州張天錫距之猛師敗績五月右將軍桓豁擊趙憶走之進獲慕容暉將趙槃送于京師秋九月以會稽內史郝愔爲都督徐兗青幽四州諸軍事平北將軍徐州刺史冬十月乙巳彭城王玄薨

三年春三月丁巳朔日有蝕之癸亥大赦夏四月癸巳雨雹大風折木秋八月壬寅尚書令衛將軍藍田侯王述卒

四年夏四月庚戌大司馬桓溫帥衆伐慕容暉秋七月辛卯暉將慕容垂帥衆距溫溫擊敗之九月戊寅桓溫裨將鄧遐朱序遇暉將傅末波於林渚又大破之戊子溫至枋頭景申以糧運不繼焚舟而歸辛丑慕容垂追敗溫後軍於襄邑冬十月大星西流有聲如雷己巳溫收散卒屯于山陽豫州刺史袁真以壽陽叛十一月辛丑桓溫自山陽及會稽

王昱會于徐中將謀後舉十二月遂城廣陵而居之

五年春正月己亥表具子雙之愛之害梁國內史朱憲汝南內史朱斌
二月癸酉表具死陳郡太守朱輔亡具子瑾嗣事求救於慕容暉夏四月
辛未桓溫部將竺瑶破瑾於武丘秋七月癸酉朔日有蝕之八月癸丑
桓溫擊表瑾於壽陽敗之九月苻堅將王猛伐慕容暉陷其土黨廣漢
妖賊李弘與益州妖賊李金根聚眾反弘自稱聖王眾萬餘人梓潼太
守周虓討平之冬十月王猛大破慕容暉將慕容評於潞川十一月猛
剋鄴獲慕容暉盡有其地

六年春正月苻堅遣將王鑒來援表瑾將軍桓伊逆擊大破之丁亥桓
溫剋壽陽斬表瑾三月壬辰監益寧二州諸軍事冠軍將軍益州刺史
建城公周楚卒夏四月戊午大赦賜窮獨米二石斛苻堅將苻雅伐仇
池仇池公楊纂降之六月京都及丹楊晉陵吳郡吳興臨海並大水秋
八月以前寧州刺史周仲孫為假節監益梁二州諸軍事益州刺史冬
十月壬子高密王俊薨十月癸卯桓溫自廣陵屯于白石丁未詣闕

因圖廢立誣帝在藩夙有痿疾嬖人相龍計好朱靈寶等參侍內寢而二美人田氏孟氏生三男長欲封樹時人惑之溫因諷太后以伊霍之舉已西集百官于朝堂宣宗德太后令曰王室艱難穆哀短祚國嗣不育儲宮靡立琅邪王奔親則母弟故以入纂大位不圖德之不建乃至於斯昏濁潰亂動違禮度有些孽莫知誰子人倫道喪醜聲遐布既不可以奉守社稷敬永宗廟且昏孽並大便欲建樹儲藩誣罔祖宗傾移皇基是而可忍孰不可懷今廢奔爲東海王以王還第供衛之儀皆如漢朝昌邑故事但未亡人不幸罹此百憂感念存沒心正焉如割社稷大計義不獲已臨紙悲塞如何可言於是百官入太極前殿即日桓溫使散騎侍郎劉暉收帝璽綬帝著白紗單衣步下西堂乘犢車出神獸門群臣拜辭莫不歎歎侍御史殿中監將兵百人衛送東海第初桓溫有不臣之志欲先立功河朔以收時望及枋頭之敗威名頓挫遂潛謀廢立以長威權然憚帝守道恐招時議以宮闈重閔牀第易誣乃言帝爲闇遂行廢辱初帝平生每以爲慮嘗召術人扈謙筮之卦成否曰晉室

有盤石之固陛下有出宮之象竟如其言咸安二年正月降封帝為海西縣公四月徙居吳縣勅吳國內史刁彛防衛又遣御史顧允監察之十月妖賊盧悚遣弟子殿中監許龍晨到其門稱太后密詔奉迎與復帝初欲從之納保母諫而止龍曰大事將捷焉用兒女子言乎帝曰我得罪於此幸蒙寬宥豈敢妄動哉且太后有詔便應官屬來何獨使汝也汝必為亂因此左右縛之龍懼而走帝知天命不可再深慮橫禍乃杜塞聰明無思無慮終日酣暢耽于內寵有子不育庶保天年時人憐之為作歌焉朝廷以帝安於屈辱不復為虞太元十一年十月甲申薨于吳時年四十五

史臣曰孝宗因繼抱之姿用母氏之化中外無事十有餘年以武安之才啓之疆場以文王之風被乎江漢則孔子所謂吾無間然矣哀皇寬惠可以為君而鴻祀穰天用塵其德東海違許龍之駕屈放命之臣所謂柔弱勝剛疆得盡於天年者也

贊曰委裘稱化大孝為宗遵彼聖善成茲允恭西旌玉壘北飾金墉遷

殷舊勳莫不來從哀后寬仁惟靈既集海西多故時災見及彼異阿衡
我非昌邑

帝紀卷第八

晉書八

帝紀卷第九

晉書九

御撰

簡帝

孝武帝

簡文皇帝諱昱字道萬元帝之少子也幼而岐嶷為元帝所愛耶謫見而謂人曰興晉祚者必此人也及長清虛寡欲尤善玄言永昌元年元帝詔曰先公武王先考恭王君臨琅邪繼世相承國嗣未立恭王葬主朕常悼心子昱仁明有智度可以虔奉宗廟以慰罔極之恩其封昱為琅邪王食會稽置城如舊咸和元年所生鄭夫人薨帝時年七歲號慕泣血固請服重元帝哀而許之故徙封會稽王拜散騎常侍九年遷右將軍加侍中咸康六年進撫軍將軍領祕書監建元元年夏五月癸丑康帝詔曰太常職奉天地兼掌宗廟其為任也可謂重矣是以古今選建未嘗不妙簡時望兼之儒雅會稽王叔履尚清虛志道无倦優游上列諷議朝肆其領太常本官如故永和元年崇德太后臨朝進位撫軍大將軍錄尚書一條事二年驃騎何充卒康帝崩崇德太后詔帝專摠萬機八年進位司徒固讓不拜穆帝始冠帝稽首歸政不許廢帝即位

以琅邪王絕嗣復徙封琅邪而封王子昌明爲會稽王帝固讓故雖封琅邪而不去會稽之號太和元年進位丞相錄尚書事入朝不趨讚拜不名劔履上殿給羽葆鼓吹班劔六十人又固讓及廢帝廢皇太后詔曰丞相錄尚書會稽王體自中宗明德劭今英秀玄虛神棲事外以具瞻允塞故阿衡三世道化宣流人望攸歸爲日已久宜從天人之心以統皇極主者明依舊典以時施行於是大司馬桓溫率百官進太極前殿具乘輿法駕奉迎帝於會稽邸於朝堂變服著平巾幘單衣東向拜受璽綬

咸安元年冬十月己酉即皇帝位桓溫出次中堂分兵屯衛乙卯溫奏廢太宰武陵王晞及子摠詔魏郡太守毛安之帥所領宿衛殿內改元爲咸安庚戌使兼太尉周顒告于太廟辛亥桓溫遣弟秘逼新蔡王晃詣西堂自列与太宰武陵王晞等謀反帝對之流涕溫皆收付廷尉癸丑殺東海王二子及其母初帝以冲虛簡貴庾亮等三世溫素所敬憚及初即位溫乃撰辭欲自陳述帝引見對之悲泣溫懼不能言至是有

司承其旨奏誅武陵王晞帝不許溫固執至于再三帝手詔報曰若晉祚靈長公便宜奉行前詔如其大運去矣請避賢路溫覽之流汗变色不復敢言乙卯廢晞及其三子徙于新安景辰放新蔡王晃于衡陽戊午詔曰王室多故穆哀早世皇胤風遷神器无主東海王以母弟近屬入纂大統嗣位經年昏闇亂常人倫虧喪大禍將及則我祖宗之靈靡知所託皇太后深懼皇基時定大計大司馬因順天人協同神略親帥群后恭承明命雲霧旣除皇極載清乃顧朕躬仰承洪緒雖伊尹之寧殷朝博陸之安漢室无以尚也朕以寡德猥居元首實懼眇然不克負荷戰戰兢兢罔知攸濟思与兆庶更始其大赦天下大酺五日增文武位二等孝順忠貞鰥寡孤獨米人五斛已未賜溫軍三萬人人布二匹米一斛庾申加大司馬桓溫為丞相不受辛酉溫旋自白石因鎮姑孰以冠軍將軍毛武生都督荊州之沔中揚州之義城諸軍事十二月戊子詔以京都有經年之儲權停一年之運庾寅廢東海王弈為海西公食邑四千戶辛卯初薦酈淶酒於太廟

二年春正月辛丑百濟林邑王各遣師貢方物二月苻堅伐慕容桓於遼東滅之三月丁酉詔曰朕居阿衡三世不能濟彼時雍乃至海西失德殆傾皇祚賴祖宗靈祇之德皇太后淑體應期藩輔忠賢百官戮力用能蕩氛霧於昊蒼耀宸輝於宇宙遂以眇身託于主公之上思賴群賢以弼其闕夫敦本息末抑絕華競使清濁異流能否殊貫官无秕政士无謗讟不有徵勸則德礼焉施且強寇未殄勞役未息自非軍國戎祀之要其華飾煩費之用皆省之夫肥遯窮谷之賢滑泥揚波之士雖抗志玄霄潛默幽岫貪屈高尚之道以隆協贊之美孰与自足山水栖遲丘壑徇匹夫之契而忘兼濟之大耶古人不借賢於曩代朕所以虛想於今日内外百官各勤所司使善无不逢惡无不聞令詩人无素餐之刺而吾獲虛心之求焉癸丑詔曰吾承祖宗洪基而昧于政道懼不能允釐天王克隆先業夕惕惟憂若涉泉水賴宰輔忠德道濟伊望群后竭誠協契斷金内外盡匡翼之規文武致匪躬之節異因斯道終克弘濟每念干戈未戢公私疲悴藩鎮有疆理之務征伐懷東山之勤或白

首戎陣忠勞未敘或行役彌久儋石靡儲何嘗不昧且晨興夜分忘寢雖未能撫而巡之且欲達其此心可遣大使詣大司馬并問方伯逮于邊戎宣詔大饗食求其所安又籌量賜給悉令周普乙卯詔曰往事故之後百度未充群僚常俸並皆寡約蓋隨時之義也然退食在朝而祿不代耕非經通之制今資儲漸豐可籌量增俸騶虞見豫章夏四月徙海西公於吳縣西柴里追貶庾后曰夫人六月遣使拜百濟王餘句爲鎮東將軍領樂浪太守戊子前護軍將軍庾希舉兵反自海陵入京口晉陵太守卞耽奔于曲阿秋七月壬辰桓溫遣東海內史周少孫討希擒之斬于建康市乙未立會稽王昌明爲皇太子皇子道子爲琅邪王領會稽內史是日帝崩于東堂時年五十三葬高平陵廟號太宗遺詔以桓溫輔政依諸葛亮王導故事帝少有風儀善容止留心典籍不以居處爲意凝塵滿席湛如也嘗與桓溫及武陵王晞同載遊版橋溫遽令鳴鼓吹角車馳卒奔欲觀其所爲晞大恐求下車而帝安然無懼色溫由此憚服溫旣杖文武之任屢建大功加以廢立威振内外帝雖處尊

位拱默守道而已常懼廢黜先是熒惑入太微尋而海西廢及帝登阼熒惑又入太微帝其惡焉時中書郎劾超在直帝乃引入謂曰命之脩短本所不計故當無復近日事邪超曰大司馬臣溫方內固社稷外恢經略非常之事臣以百口保之及超請急省其父帝謂之曰致意尊公家國之事遂至於此由吾不能以道匡衛愧歎之深言何能喻因詠庾闡詩云志士痛朝危忠臣哀主辱遂泣下霑襟帝雖神識恬暢而無濟世大略故謝安稱爲惠帝之流清談差勝耳沙門支道林嘗言會稽有遠體而無遠神謝靈運述其行事亦以爲報獻之輩云

孝武皇帝諱曜字昌明簡文帝第三子也興寧三年七月甲申初封會稽王咸安二年秋七月己未立爲皇太子是日簡文帝崩太子即皇帝位詔曰朕以不造奄丁閔凶號天扣地靡知所訴藐然幼冲眇若綴旒深惟社稷之重大懼不克負荷仰憑祖宗之靈積德之祀先帝淳風玄化遺詠在民宰輔英賢勳隆德盛顧命之託寔賴匡訓群后率職百寮勤政翼孤弱之躬有寄皇極之基不隊先恩遺惠播于四海思弘餘潤

以康黎庶其大赦天下與民更始九月甲寅追尊皇妣會稽王妃曰順
皇后冬十月丁卯葬簡文皇帝于高平陵十一月甲午妖賊盧晨入殿
庭游擊將軍毛安之等討擒之是歲三吳大旱人多餓死詔所在賑給
苻堅陷仇池執秦州刺史楊世

寧康元年春正月己丑朔改元二月大司馬桓溫來朝三月癸丑詔除
丹楊竹格等四桁統夏五月旱秋七月己亥使持節侍中都督中外諸軍
事丞相錄尚書大司馬揚州牧平北將軍徐兗二州刺史南郡公桓溫
薨庚戌進右將軍桓豁為征西將軍以江州刺史桓沖為中軍將軍都
督揚豫江三州諸軍事揚州刺史鎮姑孰八月壬子崇德太后臨朝攝
政九月苻堅將楊安寇成都景申以尚書僕射王彪之為尚書令吏部
尚書謝安為尚書僕射吳國內史刁彝為北中郎將徐兗二州刺史鎮
廣陵復置光祿勳大司農少府官冬十月西平公張天錫貢方物十一
月苻堅將楊安陷梓潼又梁益二州刺史周仲孫帥騎五千南遁
二年春正月癸未朔大赦追封謚故會稽世子郁為臨川獻王己酉北

中郎將徐兗二州刺史刁彝卒二月癸丑以丹楊尹王坦之為北中郎將徐兗二州刺史丁巳有星孛于女虛三月景戌星見於氐夏四月壬戌皇太后詔曰頃玄象或愆上天表異仰觀所變震懼于懷夫因變致休自古之道朕敢不剋意復心以思厥中又三吳奧壤股肱望郡而水旱併臻百姓失業夙夜惟憂不能忘懷宜時拯卹救其彫困三吳義興晉陵及會稽遭水之縣尤甚者全除一年租布其次聽除半年受振貸者即以賜之五月蜀人張育自號蜀王帥眾圍成都遣使稱藩秋七月涼州地震山崩苻堅將鄧羌攻張育滅之八月以長秋將建權停婚姻九月丁丑有星孛于天市冬十一月己酉天門蜚賊攻郡太守王匪死之征西將軍桓豁遣師討平之長城人錢步射錢弘等作亂吳興太守朱序討平之癸酉威遠將軍桓石虔破苻堅將姚萇於墊江

三年春正月辛亥大赦夏五月景午北中郎將徐兗二州刺史藍田侯王坦之卒申寅以中軍將軍楊州刺史桓沖為鎮北將軍徐州刺史鎮丹徒尚書僕射謝安領揚州刺史秋八月癸巳立皇太后王氏大赦加文

武位一等九月帝講孝經冬十月癸酉朔日有蝕之十二月甲申神獸
門災癸未皇太后詔曰頃日蝕告變水旱不適雖克己思救未盡其方
其賜百姓窮者米人五斛癸巳帝釋奠于中堂祠孔子以顏回配

太元元年春正月壬寅朔帝加元服見于太廟皇太后歸政甲辰大赦
改元景午帝始臨朝以征西將軍桓豁為征西大將軍領軍將軍郗愔
為鎮軍大將軍中軍將軍桓仲為車騎將軍加尚書僕射謝安中書監錄
尚書事甲子謁建平平等四陵夏五月癸丑地震甲寅詔曰頃者上天垂
監譴告屢彰朕有懼焉震惕于心思所以議獄緩死赦過宥罪庶因大
變與之更始於是大赦增文武位各一等六月封河間王欽子範之為
章武王秋九月苻堅將苟萇陷涼州虜刺史張天錫盡有其地乙巳除
度田收租之制公主以下口稅米三斛蠲在役之身冬十月移淮北流人
於淮南十一月己巳朔日有蝕之詔太官徹膳十二月苻堅使其將苻
洛攻代執代王涉翼犍

二年春正月繼絕世紹功臣三月以兖州刺史朱序為南中郎將梁州

刺史監河中諸軍鎮襄陽閏月壬午地震甲申暴風折木發屋夏四月
己酉雨雹五月丁丑地震六月己巳暴風揚沙石林邑貢方物秋七月
己卯老人星見八月壬辰車騎將軍桓沖來朝丁未以尚書僕射謝安
爲司徒景辰使持節都督荆梁寧益廣六州諸軍事荊州刺史征西大
將軍桓豁卒冬十月辛丑以車騎將軍桓沖都督荆江梁益寧交廣七
州諸軍事領護南蠻校尉荊州刺史尚書王蘊爲徐州刺史督江南晉
陵諸軍征西司馬謝玄爲兖州刺史廣陵相監江北諸軍壬寅散騎常
侍左光祿大夫尚書令王彪之卒十二月庚寅以尚書王劭爲尚書僕射
○三年春正月乙巳作新宮帝移居會稽王邸二月乙丑雷雨暴風發屋
折木夏五月庚午陳留王曹恢薨六月大水秋七月辛巳帝入新宮乙
酉老人星見南方

四年春正月辛酉大赦郡縣遭水旱者減租稅景子謁建平亭七陵二
月戊午苻堅使其子丕攻陷襄陽執南中郎將朱序又陷順陽三月大
疫壬戌詔曰狡寇縱逸藩宇傾沒疆場之虞事兼平日其內外衆官各

悉心勦力以康庶事又年穀不登百姓多匱其詔御所供事從儉約九親供給衆官廩俸權可減半凡諸役費自非軍國事要皆宜停省以周時務癸未使右將軍毛武生帥師伐蜀夏四月苻堅將苻鍾陷魏興太守吉挹死之五月苻堅將句難彭超陷盱眙高密內史毛璩之爲賊所執六月大旱戊子征虜將軍謝玄及超難戰于君川大破之秋八月丁亥以左將軍王蘊爲尚書僕射乙未暴風揚沙石九月盜殺建安太守傅湛冬十二月己酉朔日有蝕之

五年春正月乙巳謁崇平陵夏四月大旱癸酉大赦五歲刑以下五月大水以司徒謝安爲衛將軍儀同三司六月甲寅震含章殿四柱并殺內侍二人甲子以比歲荒儉大赦自太元三年已前逋租宿債皆蠲除之其鰥寡窮獨孤老不能自存者人賜米五斛丁卯以驃騎將軍琅邪王道子爲司徒秋九月癸未皇后王氏崩冬十月九真太守李遜據交州反十一月乙酉葬定皇后于隆平陵

六年春正月帝初奉佛法立精舍於殿內引諸沙門以居之丁酉以尚

書謝石爲尚書僕射初置督運御史官夏六月庚子朔日有蝕之揚荆江三州大水己巳改制度減煩費損吏貲七百人秋七月景子赦五歲刑已下甲午交趾太守杜瑗斬李遜交州平大饑冬十月己亥以鎮軍大將軍郗愔爲司空會稽人檀元之反自號安東將軍鎮軍參軍謝謫之討平之十二月甲辰苻堅遣其襄陽太守閻震寇竟陵襄陽太守桓石虔討擒之

七年春三月林邑范熊遣使獻方物秋八月癸卯大赦九月東夷五國遣使來貢方物苻堅將都貴焚燒沔北田穀略襄陽百姓而去冬十月景子雷

八年春二月癸未黃霧四塞三月始興南康廬陵大水平地五丈丁巳大赦夏五月輔國將軍楊亮伐蜀拔五城擒苻堅將魏光秋七月鷹揚將軍郭洽及苻堅將張崇戰于武當大敗之八月苻堅帥衆渡淮遣征討都督謝石冠軍將軍謝玄輔國將軍謝琰西中郎將桓伊等距之九月詔司徒琅邪王道子錄尚書六條事冬十月苻堅弟融陷壽春乙亥諸

將及苻堅戰於肥水大破之俘斬數萬計獲堅輿輦及雲母車十月
庚申詔衛將軍謝安勞旋師于金城王子立陳留王卅子靈誕為陳留
王十二月庚午以寇難初平大赦以中軍將軍謝石為尚書令開酒禁
始增百姓稅米口五石前句町王翟遼背苻堅舉兵於河南慕容垂自
鄴與遼合遂攻堅子暉於洛陽仇池公楊世奔還隴右遣使稱藩

九年春正月庚子封武陵王孫寶為臨川王戊午立新寧王晞子遵為新
寧王辛亥謁建平平等四陵龍驤將軍劉牢之克譙城車騎將軍桓冲部
將郭寶伐新城魏興上庸三郡降之二月辛巳使持節都督荆江梁寧
益交廣七州諸軍事車騎將軍荊州刺史桓冲卒慕容垂自洛陽與翟
遼攻苻堅子不於鄴三月以衛將軍謝安為太保苻堅北地長史慕容
泓平陽太守慕容冲並起兵背堅夏四月己卯增置太學生百人封張
天錫為西平公使竟陵太守趙統伐襄陽克之苻堅將姚萇背堅起兵
於北地自立為王國號秦六月癸丑朔宗德皇太后褚氏崩慕容泓為殺
父冲所殺冲自稱皇太弟秋七月戊戌遣兼司空高密王純之脩謁洛陽

五陵已酉堃康獻皇后于崇平陵百濟遣使來貢方物苻堅及慕容冲戰于鄆西堅師敗績八月戊寅司空郝愔薨九月辛卯前鋒都督謝玄攻苻堅將兗州刺史張崇于鄆城克之甲午加太保謝安大都督楊江荆司豫徐兗青冀幽并梁益雍涼十五州諸軍事冬十月辛亥朔日有蝕之丁巳河間王曇之薨乙丑以玄象垂度大赦庚午立前新蔡王晃弟崇爲新蔡王苻堅青州刺史苻助帥衆來降十二月苻堅將呂光稱制于河右自號酒泉公慕容冲僭即皇帝位于阿房

十年春正月甲午謁諸陵二月立國學蜀郡太守任權斬苻堅益州刺史李平益州平三月榮陽人鄭粦以郡來降苻堅國亂使使奉表請迎龍驤將軍劉牢之及慕容垂戰于黎陽王師敗績夏四月景辰劉牢之與沛郡太守周次及垂戰于五橋澤王師又敗績壬戌太保謝安帥衆救苻堅五月大水苻堅留太子宏守長安奔于五將山六月宏來奔慕容冲入長安秋七月苻不自枋頭西走龍驤將軍檀玄追之爲丕所敗旱饑丁巳老人星見八月田武大赦丁酉使持節侍中中書監大都督

十五州諸軍事衛將軍太保謝安薨庾子以琅邪王道子為都督中外諸軍事是月姚萇殺苻堅而僭即皇帝位九月呂光據姑臧自稱涼州刺史苻丕僭即皇帝位于晉陽冬十月丁亥論淮肥之功追封謝安廬陵郡公封謝石南康公謝玄康樂公謝琰望蔡公桓伊永脩公自餘封拜各有差是歲乞伏國仁自稱大單于秦河二州牧

十一年春正月辛未慕容垂僭即皇帝位于中山壬午翟遼襲黎陽執太守滕恬之乙酉謁諸陵慕容冲將許木末殺慕容冲於長安三月大赦太山太守張願以郡叛降于翟遼夏四月以百濟王卅子餘暉為使持節都督鎮東將軍百濟王代王拓拔圭始改稱魏癸巳以尚書僕射陸納為尚書左僕射譙王恬為尚書右僕射六月己卯地震庚寅以前輔國將軍楊亮為西戎校尉雍州刺史鎮南山陵秋八月庚午封孔靖之為奉聖亭侯奉宣尼祀丁亥安平王邃之薨翟遼寇譙龍驤將軍朱序擊走之冬十月慕容垂破苻丕於河東丕走東垣揚威將軍馮該擊斬之傳首京都甲申海西公苻萇十一月苻丕將苻登僭即皇帝位于

隴東

十二年春正月乙巳以豫州刺史朱序爲青兗二州刺史鎮淮陰丁未大赦壬子暴風發屋折木戊午慕容垂寇河東濟北太守溫詳奔彭城翟遼遣子釗寇陳潁朱序擊走之夏四月戊辰尊夫人李氏爲皇太妃己丑雨雹高平人翟暢執太守徐含遠以郡降于翟遼六月癸卯東帛聘處士戴逵龔玄之秋八月辛巳立皇子德宗爲皇太子大赦增文武位二等大酺五日賜百官布帛各有差九月戊午復新寧王遵爲武陵王立梁王璿子穌爲梁王冬十月松滋太守王遐之討翟遼于洛口敗之十三年夏四月戊午以青兗二州刺史朱序爲持節都督雍梁沔中九郡諸軍事雍州刺史譙王恬之爲鎮北將軍青兗二州刺史夏六月旱乞伏國仁死弟軋歸嗣僞位僭號河南王秋九月翟遼將翟發寇洛陽河南太守郭給距破之冬十二月戊子濤水入石頭毀大桁殺人乙未大風晝晦延賢堂災景申冬蠡斯百堂客館驃騎庫皆災己亥加尚書令謝石衛將軍開府儀同三司庾子尚書令衛將軍儀同三司謝石薨

十四年春正月癸亥詔淮南所獲俘虜付諸作部者一皆散遣男女自
相配匹賜百日廩其沒爲軍賞者悉贖出之以襄陽淮南饒沃地各立
一縣以居之彭城祇賊劉黎僭稱皇帝於皇丘龍驤將軍劉牢之討平
之三月扶南獻方物呂光僭號三河王夏四月甲辰彭城王弘之薨翟
遼寇滎陽執太守張卓六月壬寅使持節都督荆益寧三州諸軍事荆
州刺史桓石虔卒秋七月甲寅宣陽門四柱災八月姚萇龍襄破苻登獲
其僞后毛氏丁亥汝南王羲薨九月庚午以尚書左僕射陸納爲尚書
令冬十二月乙巳雨水冰

十五年春正月乙亥鎮北將軍譙王恬之薨龍驤將軍劉牢之及翟遼
張願戰于太山王師敗績征虜將軍朱序破慕容永於太行二月辛巳
以中書令王恭爲都督青兗幽并冀五州諸軍事前將軍青兗三州刺
史三月己酉朔地震戊辰大赦秋七月丁巳有星孛于北河八月永嘉
人李耽舉兵反太守劉懷之討平之己丑京師地震有星孛于北斗犯
紫微汚中諸郡及兗州大水龍驤將軍朱序攻翟遼于滑臺大敗之張

願來降九月丁未以吳郡太守王珣為尚書僕射冬十二月己未地震
十六年春正月庚申改築太廟夏六月慕容永寇河南太守楊佺期擊
破之己未章武王範薨秋九月癸未以尚書右僕射王珣為尚書左
僕射以太子詹事謝琰為尚書右僕射新廟成冬十月姚萇敗苻登
于安定

十七年春正月己巳朔大赦除逋宿債夏四月齊國內史蔣詵殺樂
安太守辟閭濬據青州反北平原太守辟閭渾討平之五月丁卯朔日
有蝕之六月癸卯京師地震甲寅濤水入石頭毀大桁永嘉郡潮水涌
起近海四縣人多死者乙卯大風折木戊午梁王肅薨慕容垂襲翟釗
于黎陽敗之釗奔于慕容永秋七月丁丑太白晝見八月新作東宮冬
十月丁酉太白晝見辛亥都督荆益寧三州諸軍事荊州刺史王忱卒
十一月癸酉以黃門郎殷仲堪為都督荆益梁三州諸軍事荊州刺史
庾寅徙封琅邪王道子為會稽王封皇子德文為琅邪王十二月己未
地震是歲自秋不雨至于冬

十八年春正月癸卯朔地震二月乙未地又震三月翟釗寇河南夏六月己亥始興南康廬陵大水深五丈秋七月旱閏月祆賊司馬徽聚黨於馬頭山劉牢之遣部將討平之九月景戌龍驤將軍楊佺期擊弋氏帥楊佛嵩于潼谷敗之冬十月姚萇死于興嗣偽位

十九年夏六月壬子追尊會稽王太妃鄭氏爲簡文宣太后秋七月荆徐二州大水傷秋稼遣使振卹之八月己巳尊皇太妃李氏爲皇太后宮曰崇訓慕容垂擊慕容永於長子斬之冬十月慕容垂遣其子惡奴寇廩丘東平太守韋簡及垂將尹国戰于平陸簡死之是歲符登爲姚興所殺太子崇奔于湟中僭稱皇帝

二十年春三月作宣太后廟甲寅散騎常侍光祿大夫開府儀同三司尚書令陸納卒三月庚辰朔日有蝕之夏六月荆徐二州大水十一月魏王拓拔圭擊慕容垂子寶于忝谷敗之

二十年春正月造清暑殿三月慕容垂攻平城拔之夏四月新作永安宮丁卯雨雹慕容垂死子寶嗣僞位五月甲子以望蔡公謝琰爲尚

書左僕射大水六月呂光僭即天王位秋九月庚申帝崩于清暑殿時年三十五葬隆平陵帝幼稱聰悟簡文之崩也時年十歲至晡不臨左右進諫荅曰哀至則哭何常之有謝安嘗歎以為精理不減先帝既威權已出雅有人主之量既而溺於酒色殆為長夜之飲末年長星見帝心甚惡之於華林園舉酒祝之曰長星勸汝一杯酒自古何有萬歲天子邪太白連年晝見地震水旱為變者相屬醒曰既少而傍無正人竟不能改焉時張貴人有寵年幾三十帝戲之曰汝以年當廢矣貴人潛怒向夕帝醉遂暴崩時道子昏惑元顯專權竟不推其罪人初簡文帝見讖云晉祚盡昌明及帝之在孕也李太后夢神人謂之曰汝生男以昌明為字及產東方如明因為名焉簡文帝後悟乃流涕及為清暑殿有識者以為清暑反為楚聲哀楚之徵也俄而帝崩晉祚自此傾矣史臣曰前史稱不有廢也君何以興若乃天挺惟神光膺嗣位邁油雲而驤首濟沉川而能躍少康一旅之衆所以闡帝圖成湯七十之基所以興王業靜河海於既泄補穹圓於已紊事異於斯則弗由也簡皇以虛

白之姿在也如之會政由桓氏祭則寡人太宗晏駕寧康纂業天誘其衷姦臣自隕于時西踰劒岫而跨靈山北振長河而臨清洛荆吳戰旅嘯吒成雲名賢間出舊德斯在謝安可以鎮雅俗彪之足以正綱紀桓沖之夙夜王家謝玄之善斷軍事于時上天乃眷彊氏自泯五尺童子振袂臨江思所以挂旆天山封泥函谷而條綱弗垂威恩罕樹道子荒乎朝政國寶彙以小人拜授之榮初非天旨弼罰刑之貨自走權門毒賦年滋愁民歲廣是以間人許榮馳書詣闕列宗知其抗直而惡聞逆耳肆一醉於崇朝飛于觴於長夜雖復昌明表夢安聽神言而金行頽弛抑亦人事語曰大國之政未陵夷小邦之亂已傾覆也屬苻堅百六之秋棄肥水之衆帝號爲武不亦優哉贊曰君若綴旒道非交泰簡皇凝寂不貽伊害孝武登朝姦雄自消燕之擊路鄭叔分鑣倡臨帝席洒勸天妖金風不競人事先凋

晉書帝紀卷第九

帝紀卷第十

晉書十

御撰

安帝

恭帝

安皇帝諱德宗字德宗孝武帝長子也太元十二年八月辛巳立爲皇太子二十一年九月庚申孝武帝崩辛酉太子卽皇帝位大赦癸亥以司徒會稽王道子爲太傅攝政冬十月甲申葬孝武皇帝于隆平陵大雪

隆安元年春正月己亥朔帝加元服改元增文武位一等太傅會稽王道子稽首歸政以尚書左僕射王珣爲尚書令領軍將軍王國寶爲尚書左僕射二月呂光將禿髮烏孤自稱大都督大單于國號南涼擊光將竇苟于金昌大破之甲寅尊皇太后李氏爲太皇太后戊午立皇太后王氏三月呂光子纂爲乞伏乾歸所敗光建康太守段業自號涼州牧慕容寶敗魏師于薊夏四月甲戌兗州刺史王恭豫州刺史庾楷舉兵以討尚書左僕射王國寶建威將軍王緒爲名甲申殺國寶又緒以悅于恭恭乃罷兵戊子大赦五月前司徒長史王廞以吳郡反王恭討平之慕容寶將慕容詳僭卽皇帝位于中山寶奔黃龍秋八月呂光爲其僕

射楊軌散騎常侍郭謨所攻光子纂擊走之九月慕容寶將慕容麟
斬慕容詳于中山因僭即皇帝位冬十月慕容麟爲魏師所敗

二年春三月龍舟二災夏五月蘭汗弑慕容寶而自稱大將軍昌黎王
秋七月慕容寶子盛斬蘭汗僭稱長樂王攝天子位充州刺史王恭豫
州刺史庾楷荊州刺史殷仲堪廣州刺史桓玄南蠻校尉楊佺期等舉
兵反八月江州刺史王浚奔于臨川景子寧朔將軍鄧啓及慕容德將慕
容法戰于管城王師敗績景成慕容盛僭即皇帝位於黃龍桓玄大敗
王師于白石九月辛卯加太傅會稽王道子黃鉞遣征虜將軍會稽王
世子元顯前將軍王珣右將軍謝琰討桓玄等已亥破庾楷于牛渚景
午會稽王道子屯中堂元顯守石頭己酉前將軍王珣守北郊右將軍
謝琰備宣陽門輔國將軍劉牢之次新亭使子敬宣擊敗恭恭奔曲阿
長塘湖湖尉收送京師斬之於是遣太常卿茂喻仲堪及玄玄等走于
尋陽冬十月新野言騶虞見景子大放壬午仲堪等盟于尋陽推桓
玄爲盟主十一月以琅邪王德文爲衛將軍開府儀同三司領軍將軍

王稚爲尚書左僕射十二月己丑魏王圭卽尊位年號天興京兆人韋禮帥襄陽流人叛降于姚興己酉前新安太守杜炯反于京口會稽王世子元顯討斬之禿髮烏孤自稱武威王

三年春正月辛酉封宗室蘊爲淮陵王二月甲辰河間王國鎮薨林邑范達陷日南九真遂寇交趾太守杜瑗討破之段業自稱涼王仇池公楊盛遣使稱藩獻方物三月己卯追尊所生陳夫人爲德皇太后夏四月乙未加尚書令王珣衛將軍以會稽王世子元顯爲揚州刺史六月戊子以琅邪王德文爲司徒慕容德陷青州害龍驤將軍辟閭渾遂潛卽皇帝位于廣固秋八月禿髮烏孤死其弟利鹿孤嗣僞位冬十月姚興陷洛陽執河南太守辛恭靜十一月甲寅妖賊孫恩陷會稽內史王凝之死之吳國內史桓謙臨海太守新蔡王崇義興太守魏隱並委官而遁吳興太守謝邈永嘉太守司馬逸皆遇害遣衛將軍謝琰輔國將軍劉牢之逆擊走之十二月桓玄龍襄江陵荊州刺史殷仲堪南蠻校尉楊佺期並遇害呂光立其太子紹爲天王自號太上皇是日光死呂纂纂

弑紹而自立是歲荊州大水平地三丈

四年春正月乙亥大赦二月己丑有星孛于奎婁進至紫微三月彗星見于太微夏四月地震孫恩寇浹口五月景寅散騎常侍衛將軍東亭侯王珣卒己卯會稽內史謝琰爲孫恩所敗死之恩轉寇臨海六月庚辰朔日有蝕之旱輔國司馬劉裕破恩于南山恩將盧循陷廣陵死者三千餘人以琅邪王師何澄爲尚書左僕射秋七月壬子太皇太后李氏崩丁卯大赦是月姚興伐乞伏軻歸降之八月丁亥尚書右僕射王雅卒壬寅葬文太后于脩平陵九月癸丑地震冬十一月寧朔將軍高雅之及孫恩戰於餘姚王師敗績以揚州刺史元顯爲後將軍開府儀同三司都督揚豫徐兗青幽冀并荆江司雍梁益交廣十六州諸軍事前將軍劉牢之爲鎮北將軍封元顯子彥璋爲東海王十二月戊寅有星孛于天市是歲河右諸郡奉涼武昭王李玄盛爲秦涼二州牧涼公年號庚子

五年春二月景子孫恩復寇浹口呂超弑呂纂以其兄隆潛卽僞位三

月甲寅衆星西流歷太微夏五月孫恩寇吳國內史袁山松死之沮渠
蒙遜殺段業自號大都督北涼州牧六月甲戌孫恩至丹徒乙亥内外
戒嚴百官入居于省冠軍將軍高素右衛將軍張崇之守石頭輔國將
軍劉襲柵斷淮口丹楊尹司馬恢之戍南岸冠軍將軍桓謙輔國將軍
司馬允之游擊將軍毛遂備白石左衛將軍王嘏領軍將軍孔安國屯
中堂皇徵豫州刺史譙王尚之衛京師寧朔將軍高雅之擊孫恩於廣
陵之郁洲爲賊所執秋七月段興弒慕容盛盛叔父熙盡誅段氏因僭
稱尊號九月呂隆之降于姚興冬十月姚興帥師侵魏大敗而旋是歲
饑霖洒

元興元年春正月庚午朔大赦改元以後將軍元顯爲驃騎大將軍征
討大都督鎮北將軍劉牢之爲元顯前鋒前將軍譙王尚之爲後部以
討桓玄三月景午帝戎服餞元顯于西池丁巳遣兼侍中齊王柔之以
騶虞幡宣告荆江二州丁卯桓玄敗王師于姑孰譙王尚之齊王柔之
並死之以右將軍吳隱之爲都督交廣二州諸軍事廣州刺史三月己

已劉牢之叛降于桓玄辛未王師敗績于新亭驃騎大將軍會稽王世子元顯東海王彥璋冠軍將軍毛泰游擊將軍毛邃並遇害王申桓玄自爲侍中丞相錄尚書事以桓謙爲尚書僕射遷太傅會稽王道子于安城玄俄又自稱太尉揚州牧惣百揆以琅邪王德文爲大宰臨海太守辛晷擊孫恩斬之是月禿髮利鹿孤死弟儁檀嗣僞位秋七月乙亥新蔡王崇爲其奴所害八月庚子尚書下舍災冬十月冀州刺史劉軌叛奔于慕容德十一月庚申會稽王道子爲桓玄所害曲赦廣陵彭城大逆以下

二年春二月辛丑建威將軍劉裕破徐道覆于東陽乙卯桓玄自稱大將軍丁巳冀州刺史孫無終爲桓玄所害夏四月癸巳朔日有蝕之秋八月玄又自號相國楚王九月南陽太守庾仄起義兵爲玄所敗冬十一月壬午玄遷帝于永安宮癸未移太廟神主于琅邪國十二月壬辰玄篡位以帝爲平固王辛亥帝蒙塵于尋陽

三年春二月帝在尋陽庚寅夜濤水入石頭漂殺人戶乙卯建武將

軍劉裕帥沛國劉毅東海何無忌等舉義兵景辰斬桓玄所署徐州刺史桓脩于京口青州刺史桓弘于廣陵丁巳義師濟江三月戊午劉裕斬玄將吳甫之于江乘斬皇甫敷於羅落己未玄衆潰而逃庚申劉裕置留臺具百官壬戌桓玄司徒王謐推劉裕行鎮軍將軍徐州刺史都督揚徐兗豫青冀幽并八州諸軍事假節劉裕以謐領揚州刺史錄尚書事辛酉劉裕誅尚書左僕射王愉愉子荊州刺史綏司州刺史溫詳辛未桓玄逼帝西上景戌密詔以幽逼於玄萬機虛曠今武陵王遵依舊典永制摠百官行事加侍中餘如故并大赦謀反大逆已下惟桓玄一祖之後不宥夏四月己丑大將軍武陵王遵稱制摠萬機庚寅帝至江陵庚戌輔國將軍何無忌振武將軍劉道規及桓玄將庾稚何澹之戰于湓口大破之玄復逼帝東下五月癸酉冠軍將軍劉毅及桓玄戰于崢嶸洲又破之己卯帝復幸江陵辛巳荊州別駕王康產南郡太守王騰之奉帝居于南郡壬午督護馮遷斬桓玄於貊盤洲乘輿反正于江陵甲申詔曰姦兇篡逆自古有之朕不能式遏杜漸以致播越賴鎮

軍將軍裕英略奮發忠勇絕世冠軍將軍毅等誠心宿著協同嘉謀義聲
旣振士庶效節社稷載安四海齊慶其大赦凡諸畏逼事屈逆命者一
無所問戊寅奉神王入于太廟閏月己丑桓玄故將揚武將軍桓振陷
江陵劉毅何無忌退守尋陽帝復家塵于賊營正月益州刺史毛璩討
僞梁州刺史桓希斬之秋七月戊申永安皇后何氏崩八月癸酉祔葬
穆帝章皇后于永平陵九月前給事中刁騁祕書丞王邁之謀反伏誅
冬十月盧循寇廣州刺史吳隱之爲循所敗執始興相阮佃之而還慕
容德死兄子超嗣僞位

義熙元年春正月帝在江陵南陽太守曾宗之起義兵龍襄破襄陽己丑
劉毅次子馬頭桓振以帝屯于江津辛卯宗之破振將溫楷于柞溪進
次紀南爲振所敗振武將軍劉道規斬桓謙走之乘輿反正帝與琅邪
王孝道規舟戊戌詔曰朕以寡德夙纂洪緒不能緝熙遐邇式遏茲允
逆臣桓玄乘豐肆亂乃誣罔天人篡據極位朕躬播越淪胥荒裔宣皇
之基眇焉以墜賴鎮軍將軍裕忠武英斷誠冠終古運謀機始貞賢協

其契拔埃拉衆義士感其心故霜戈一揮巨猾奔迸三率稜威大慙授
首而孽振猖狂嗣凶荆郢幸天祚社稷義旗載捷狡徒沮潰朕獲反正
斯實宗廟之靈勤王之勲豈朕一人獨享伊祐思與億兆幸茲更始其
大赦改元唯玄振一祖及同黨不在原例賜百姓爵二級鰥寡孤獨穀
人五斛大酺五日二月丁巳留臺備乘輿法駕迎帝於江陵弘農太守
戴寧之建威主簿徐惠子等謀反伏誅平西叅軍譙縱害平西將軍益
州刺史毛璩以蜀叛三月桓振復龍衣江陵荊州刺史司馬休之奔于襄
陽建威將軍劉懷肅討振斬之帝至自江陵乙未百官詣闕請罪詔曰
此非諸卿之過其還率職戍戍舉章皇后哀三日臨于西堂劉裕及何
無忌等抗表遜位不許庾子以琅邪王德文爲大司馬武陵王遵爲太
保加鎮軍將軍劉裕爲侍中車騎將軍都督中外諸軍事甲辰詔曰自
頃國難之後人物彫殘常所供奉猶不改舊豈所以視人如傷禹湯歸
過之誠哉可籌量減省夏四月劉裕旋鎮京口戊辰餞于東堂五月癸
未禁綃扇及擣蒲游擊將軍章武王秀益州刺史司馬軌之謀反伏誅

桓玄故將桓亮苻宏乃預寇湘州守將擊走之秋八月甲子封臨川王子脩之爲會稽王冬十一月乞伏軋歸伐仇池仇池公楊盛大破之是歲涼武昭王玄盛遣使奉表稱藩

二年春正月益州刺史司馬榮期擊譙縱將譙子明于白帝破之夏五月封高密王子法蓮爲高陽王秋七月梁州刺史楊孜劾有罪伏誅冬十月論匡復之功封車騎將軍劉裕爲豫章郡公撫軍將軍劉毅南平郡公右將軍何無忌安成都郡公自餘封賞各有差乙亥以左將軍孔安國爲尚書左僕射十二月盜殺零陵太守阮野

三年春二月己酉車騎將軍劉裕來朝誅東陽太守殷仲文南蠻校尉殷叔文晉陵太守殷道叔永嘉太守駱球己丑大赦除酒禁夏五月大水六月姚興將赫連勃勃僭稱天子于朔方國號夏秋七月戊戌朔日有蝕之汝南王遵之有罪伏誅八月遣冠軍將軍劉劭宣持節監征蜀諸軍事冬十一月赫連勃勃大敗禿髮傉檀奔于南山是歲高雲馮跋殺慕容熙雲冠即帝位

四年春正月甲辰以琅邪王德文領司徒車騎將軍劉裕為揚州刺史錄尚書事庾申侍中大保武陵王遵薨夏四月散騎常侍尚書左僕射孔安國卒甲午加吏部尚書孟昶尚書左僕射冬十一月癸丑雷梁州刺史楊思平有罪棄市辛卯大風拔樹是月禿髮儁檀僭即涼王位十二月陳留王曹靈誕薨

五年春正月辛卯大赦庚戌以撫軍將軍劉毅為衛將軍開府儀同三司加輔國將軍何無忌鎮南將軍戊戌尋陽地震二月慕容超將慕容興宗寇宿豫陽平太守劉千載南陽太守趙元並為賊所執三月乙亥大雪平地數尺車騎將軍劉裕帥師伐慕容超夏六月景寅震于大廟劉裕大破慕容超于臨朐秋七月姚興將乞伏軋歸僭稱西秦王於苑川九月戊辰離班弒高雲雲將馮跋攻班弒之跋僭即王位仍號燕冬十月魏清河王紹弒其主圭

六年春二月丁亥劉裕攻慕容超剋之齊地悉平是月廣州刺史盧循反寇江州三月禿髮儁檀及沮渠蒙遜戰于窮泉儁檀敗績壬申鎮南

將軍江州刺史何無忌及循戰于豫章王師敗績無忌死之夏四月青
州刺史諸葛長民兗州史劉藩并州刺史劉道憐乃入衛京師五月景子
大風拔木戊子衛將軍劉毅及盧循戰于桑落洲王師敗績尚書左僕
射孟昶懼自殺己未大赦乙丑循至淮口內外戒嚴大司馬琅邪王德文
都督宮城諸軍事次中堂皇太尉劉裕次石頭梁王珍之屯南掖門冠
軍將軍劉劭宣屯北郊輔國將軍孟懷玉屯南岸建武將軍王仲德屯
越城廣武將軍劉懷默屯建陽門淮口築柵浦葦園廷尉三壘以距之
景寅震太廟鷄尾秋七月庚申盧循遁走甲子使輔國將軍王仲德廣
川太守劉鍾河間內史蒯恩等帥衆追之是月盧循寇荊州刺史劉道
規雍州刺史魯宗之等敗之又破徐道覆于華容賊復走尋陽八月姚
興將桓謙寇江陵劉道規敗之冬十一月蜀賊譙縱陷巴東守將溫柞
時延祖死之十二月壬辰劉裕破盧循于豫章

七年春二月壬午右將軍劉藩斬徐道覆于始興傳首京師夏四月盧
循走交州刺史杜慧度斬之秋七月丁卯以荊州刺史劉道規為征西

大將軍開府儀同三司冬十月沮渠蒙遜伐涼涼武昭王玄盛與戰敗之
○八年春二月景子以吳興太守孔靖為尚書右僕射三月甲寅山陰地
陷四尺有聲如雷夏五月乞伏公府弒乞伏軋歸乾歸子熾盤誅公府
僭即偽位六月以平北將軍曹宗之為鎮北將軍秋七月甲午武陵王
季度薨庚子征西大將軍劉道規卒八月皇后王氏崩辛亥高密王純
之薨九月癸酉葬僖皇后于休平陵己卯太尉劉裕害右將軍兖州刺
史劉藩尚書左僕射謝混庚辰裕矯詔曰劉毅包藏禍心構逆南夏
藩混助亂志肆姦宄賴宰輔玄鑒撫機挫銳凶黨即戮社稷又安夫好
生之德所因者本肆眚覃仁實資玄澤況事與大慙禍自元凶其大赦
天下唯劉毅不在其例普增文武位一等孝順忠義隱滯遺逸必令聞
達己丑劉裕帥師討毅裕叅軍王鎮惡陷江陵城毅自殺冬十一月沮
渠蒙遜僭號河西王十二月以西陵太守朱齡石為建威將軍益州刺
史帥師伐蜀分荊州十郡置湘州是歲廬陵南康地四震

九年春三月景寅劉裕害前將軍諸葛長民及其弟輔國大將軍黎民

從弟寧朔將軍秀之三月戊寅加劉裕鎮西將軍豫州刺史林邑范胡達寇九真交州刺史杜慧度斬之夏四月壬戌罷臨沂湖熟皇后脂澤田四十頃以賜貧人弛湖池之禁封鎮北將軍曾宗之為南陽郡公秋七月朱齡石克成都斬譙縱益州平九月封劉裕次子義真為桂陽公冬十二月安平王球之薨是歲高句麗倭國及西南夷銅頭大師並獻方物○十年春三月戊寅地震夏六月乞伏熾盤帥師伐禿髮檀滅之秋七月淮北大風壞廬舍九月丁巳朔日有蝕之林邑遣使來獻方物是歲城東府

十年春正月荊州刺史司馬休之雍州刺史曾宗之並率兵貳於劉裕裕帥師討之庚午大赦丁丑以吏部尚書謝裕為尚書左僕射二月丁未姚興死子泓嗣偽位三月辛巳淮陵王湛薨壬午劉裕及休之戰於江津休之敗奔襄陽夏四月乙卯青異三州刺史劉劭宣為其參軍司馬道賜所害五月甲申彗星二見甲午休之宗之出奔于姚泓論平蜀功封劉裕子義隆彭城公朱齡石豐城公己酉霍山崩出銅鍾六枚

秋七月景戌京師大水壞太廟辛亥晦日有蝕之八月丁未尚書左僕射謝裕卒以尚書右僕射劉穆之爲尚書左僕射九月己亥大赦十二年春正月姚泓使其將曹軌寇襄陽雍州刺史趙倫之擊走之二月加劉裕中外大都督夏六月赫連勃勃攻姚泓秦州陷之己酉新除尚書令都鄉亭侯劉柳辛秋八月劉裕及琅邪王德文帥衆伐姚泓景午大赦冬十月景寅姚泓將姚光以洛陽降己丑遣兼司空高密王恢之脩謁五陵

十三年春正月甲戌朔日有蝕之二月涼武昭王李玄盛薨世子士業嗣位爲涼州牧涼公三月龍驤將軍王鎮惡大破姚泓將姚紹于潼關夏劉裕敗魏將鵠于河曲斬青裨將阿薄干是月涼公李士業大敗沮渠蒙遜于鮮支澗夏五月劉裕克潼關丁亥會稽王脩之薨九月癸亥林邑獻馴象白鸚鵡秋七月劉裕克長安執姚泓攻其羣器歸諸京師南海賊徐道期陷廣州始興相劉謙之討平之冬十二月辛未左僕射前將軍劉穆之卒

十四年春正月辛巳大赦青州刺史沈田子害龍驤將軍王鎮惡于長
安夏六月劉裕為相國進封宋公冬十月以涼公士業為鎮西將軍封
酒泉公十一月赫連勃勃大敗王師于青泥北雍州刺史朱齡石焚長
安宮殿奔于潼關尋又大潰齡石死之十二月戊寅帝崩于東堂時年
三十七葬休平陵帝不惠自少及長口不能言雖寒暑更變無以辯也
凡所動止皆非已出故桓玄之篡因此獲全初識云昌明之後有二帝
劉裕將為禪代故密使王韶之縊帝而立恭帝以應二帝云

恭帝諱德文字德文安帝母弟也初封琅邪王歷中軍將軍散騎常侍
衛將軍開府儀同三司加侍中領司徒錄尚書六條事元興初遷車騎大
將軍桓玄執政進位太宰加袞冕之服綠綬綬玄篡位以帝為石陽縣
公与安帝俱居尋陽及玄敗隨至江陵玄死桓振奄至躍馬奮戈直至
階下瞋目謂安帝曰臣門戶何負國家而屠滅若是帝乃下牀謂振曰
此豈我兄弟意邪振乃下馬致拜振平復為琅邪王又領徐州刺史尋
拜大司馬領司徒加殊禮義熙五年置左右長史司馬從事中郎四人

加羽葆鼓吹十二年詔曰大司馬明德懋親大尉道勲光大並徵序彝
倫燮和二氣髦俊引領思佐鼎鼐而雅尚沖挹四門弗闢誠合大雅謙
虛之道實違急賢贊世之務昔蒲輪載徵異人並出東平開府奇士嚮
臻濟濟之盛朕有欽焉可勅二府依舊辟召必將明駁俊乂嗣軌前賢
矣於是始辟召掾屬時太尉裕都督中外諸軍詔曰大司馬地隆任重
親賢莫二雖府受節度可身無致敬劉裕之北征也帝上疏請帥所莅
啓行戎路脩敬山陵朝廷從之乃與裕俱發及有司以即戎不得奉辭
陵廟帝復上疏曰臣推轂閭外將革寒暑不獲展情埏埴私心罔極伏
願天慈特垂聽許使臣微誠粗申即路無恨許之及姚泓滅歸于京都
十四年十二月戊寅帝崩劉裕矯稱遺詔曰唯我有晉誕膺明命業
隆九有光宅四海朕以不德屬當多難幸賴宰輔拯厥顛覆仍持保祐
克黜禍亂遂冕旒辰極混一六合方憑阿衡惟新洪業而邁疾大漸將
遂弗興仰惟祖宗靈命親賢是荷咨爾大司馬琅邪王體自先皇明德
光懋屬惟儲貳衆望收集其居臨晉邦奉條宗祀允執其中燮和天下

闡揚未誥無廢我高祖之景命是日即帝位大赦

元熙元年春正月壬辰朔改元以山陵未厝不朝會立皇后褚氏甲午徵劉裕還朝戊戌有星孛于太微西藩庚申葬安皇帝于休平陵帝受朝懸而不樂以驃騎將軍劉道憐為司空秋八月劉裕移鎮壽陽以劉懷慎為前將軍北徐州刺史鎮彭城九月劉裕自解揚州冬十月乙酉裕以其子桂陽公義真為揚州刺史十一月丁亥朔日有蝕之十二月辛卯裕加殊禮己卯太史奏黑龍四見于東方

二年夏六月壬戌劉裕至于京師傅亮承裕密旨諷帝禪位草詔請帝書之帝欣然謂左右曰晉氏久已失之今復何恨乃書赤紙為詔甲子遂遜于琅邪第劉裕以帝為零陵王居于秣陵行晉正朔車旗服色一如其舊有其文而不備其禮帝自是之後深慮禍機褚后常在帝側飲食所資皆出褚后故宋人莫得伺其隙宋永初二年九月丁丑裕使后兄叔度請后有間兵人踰垣而入弑帝于內房時年三十六謚恭皇帝葬沖平陵帝幼時性頗忍急及在藩國曾令善射者射馬為戲既而

有人云馬者國姓而自殺之不祥之甚帝亦悟甚悔之其後復深信淳
屠道鑄貨千萬造丈六金像親於瓦官寺迎之步從十許里安帝既不
惠帝每侍左右消息溫涼寢食之節以恭謹聞時人稱焉

始元帝以丁丑歲稱晉王置宗廟使郭璞筮之云享二百年自丁丑
至禪代之歲年在庚申為二百四歲然丁丑始係西晉庚申終入宋年
所餘惟一百有二歲耳璞蓋以百二之期促故婉而倒之為二百也

史臣曰安帝即位之辰鍾無妄之日道子元顯並傾朝政主昏臣亂未
有不如斯亡者也雖有手握戎麾心存舊國迴首無良勿心焉蕭散於
是桓玄承輿勢踰颺指六師咸泯隻馬徂遷是以宋高非典午之臣
孫恩豈金行之寇若乃世遇顛覆則恭皇斯甚於越之民詎燠丹穴會
稽之侶寧歎入臣去皇屋而歸來灑丹書而不恨夫五運收革三微數
盡猶高秋彫候理之自然觀其搖落人有為之流連者也

贊曰安承流湏大盜斯張恭乃寓命他人是綱猶存周報始立懷王虛
尊假號異術同亡

晉書帝紀卷第十

